



歷代名賢列女氏姓譜卷之百四十九

湘鄉

蕭智漢雲澤氏纂輯

男秉信明甫氏校

上平聲

五微

微生氏

猶今人曰某生也以名爲氏微生畝魯武城人又微生高或云卽尾生期女子於藍橋洪水暴至抱梁而死

沂相氏

英賢傳魯沂大夫爲相因氏焉漢侍御史沂相封

圍龜氏

芊姓楚鬪圍龜之後一作韋龜

飛廉氏

史記秦嬴姓有飛廉氏

氏姓譜

卷百四十九

五微

飛廉氏

上平聲

魚孫氏

子姓宋公子目夷字子魚其後爲魚孫氏唐有魚孫璋

舒鮑氏

世本舒鮑偃姓國也舒鮑無終晉悼公大夫

諸葛氏

本葛氏夏商諸侯葛伯之後英賢傳云舊居琅邪諸縣後徙陽都時人謂之諸葛因以爲氏焉風俗通云葛嬰爲陳涉將軍有功非罪而誅漢文追封其孫爲諸侯因以爲氏世本云有熊氏之後爲詹葛氏齊人語訛以詹葛爲諸葛

歷代名賢

漢

諸葛豐字少季琅邪人也以明經爲郡文學名特立剛直
貢禹爲御史大夫除豐爲屬舉侍御史元帝擢爲司隸校
尉刺舉無所避京師爲之語曰間何濶逢諸葛上嘉其節
加豐秩光祿大夫時侍中許章以外屬貴幸奢淫不奉法
度賓客犯事與章相連豐案劾章欲奏其事適逢許侍中
私出豐駐車舉節諡章曰下欲收之章迫窘馳車去豐追
之許侍中因得入宮門自歸上豐亦上奏于是收豐節司
隸去節自豐始豐上書謝上不許是後所言益不用豐復
上書言臣聞伯奇孝而棄于親子胥忠而誅于君隱公慈
而殺于弟叔武弟而殺于兄夫以四子之行屈平之材然
猶不能自顯而被刑戮豈不足以觀哉使臣殺身以安國
蒙誅以顯君臣誠願之獨恐未有云補而爲衆邪所排令
讒夫得遂正直之路壅塞忠臣沮心智士杜口此愚臣之

氏姓譜

卷百四十九

六魚

魚孫氏至
諸葛氏

二

所懼也豐以春夏繫治人在位多言其短上徙豐爲城門
校尉豐上書告光祿勳周堪光祿大夫張猛上不直豐乃
制詔御史城門校尉豐前與光祿勳堪光祿大夫猛在朝
之時數稱言堪猛之美豐前爲司隸校尉不順四時修法
度專作苛暴以獲虛威朕不忍下吏以爲城門校尉不內
省諸已而反怨堪猛以求報舉告案無證之辭暴揚難驗
之罪毀譽恣意不顧前言不信之大者也朕憐豐之耆老
不忍加刑其免爲庶人終于家

三國

諸葛亮字孔明琅琊都人也漢司隸校尉諸葛豐後也
父珪字君貢漢末爲太山郡丞亮早孤從父元爲袁術所
署豫章太守元將亮及亮弟均之官會漢朝更選朱皓代
元元與荊州牧劉表有舊往依之元卒亮躬耕隴畝好爲

梁父吟身長八尺每自比于管仲樂毅時人莫之許也惟博陵崔州平穎川徐庶元直與亮友善謂爲信然時先主屯新野徐庶見先主先主器之謂先主曰諸葛孔明者臥龍也將軍豈願見之乎先主曰君與俱來庶曰此人可就見不可屈致也將軍宜枉駕顧之由是先主遂詣亮凡三往乃見因屏人曰漢室傾頽姦臣竊命主上蒙塵孤不度德量力欲信大義于天下而智術淺短遂用猖獗至于今日然志猶未已君謂計將安出亮答曰自董卓以來豪傑並起跨州連郡者不可勝數曹操比于袁紹誠兵微而衆寡然操遂能克紹以弱爲強者非惟天時抑亦人謀也曹操已擁百萬之衆挾天子以令諸侯此誠不可與爭鋒孫權據有江東已歷三世國險而民附賢能爲之用此可與爲援而不可以襲荆州北據漢沔利盡南海東連吳會西

氏姓譜

卷百四十九

六魚

諸葛氏

三

通巴蜀此用武之國而有主不能守此殆天所以資將軍將軍豈有意乎益州險塞沃野千里天府之土高祖因之以成帝業劉璋闇弱張魯在北民殷國富而不知存恤智能之士思得明君將軍既帝室之胄信義著于四海總攬英雄思賢如渴若跨有荆益保其巖阻西和諸戎南撫夷越外結好孫權內修政理天下有變則命一上將將荆州之軍以向宛洛將軍身率益州之衆以出秦川百姓孰敢不躪食壺漿以迎將軍者乎誠如是則霸業可成漢室可興矣先主曰善于是與亮情好日密關羽張飛等不悅先主解之曰孤之有孔明猶魚之有水也願諸君勿復言羽飛乃止劉表長子琦亦深器亮表受後妻之言愛少子琮不悅于琦琦每欲與亮謀自安之術亮輒拒塞未與處畫琦乃將亮游觀後園共上高樓飲宴之間令人去梯因謂

亮曰今日上不至天下不至地言出于口入于吾耳可以
言未亮答曰君不見申生在內而危重耳在外而安乎琦
意感悟陰規出計會黃祖死得出遂爲江夏太守俄而表
卒琮聞曹操來征遣使請降先主在樊聞之率其衆南行
亮與徐庶竝從爲操所追破獲庶母庶辭先主而指其心
曰本欲與將軍共圖王霸之業者以此方寸之地也今已
失老母方寸亂矣無益于事請從此別遂詣操先主至于
夏口亮曰事急矣請奉命求救于孫將軍時權擁軍在柴
桑觀望成敗亮說權權曰苟如君言劉豫州何不遂事之
乎亮曰田橫齊之壯士耳猶守義不辱况劉豫州王室之
胄英才蓋世衆士慕仰若水之歸海若事之不濟此乃天
也安能復爲之下乎權勃然曰吾不能舉全吳之地十萬
之衆受制于人吾計決矣非劉豫州莫可以當曹操者然

氏姓譜

卷百四十九

六魚

諸葛氏

四

豫州新敗之後安能抗此難乎亮曰豫州軍雖敗于長阪
今戰士還者及鬪羽水軍精甲萬人劉琦合江夏戰士亦
不下萬人曹操之衆遠來疲弊聞追豫州輕騎一日一夜
行三百餘里此所謂強弩之末勢不能穿魯縞者也故兵
法忌之曰必厭上將軍且北方之人不習水戰又荊州之
民附操者逼兵勢耳非心服也今將軍誠能命猛將統兵
數萬與豫州協規同力破操軍必矣操軍破必北還如此
則荊吳之勢強鼎足之形成矣成敗之機在于今日權大
悅卽遣周瑜程普魯肅等水軍三萬隨亮詣先主并力拒
曹操操敗于赤壁引軍歸鄴先主遂收江南以亮爲軍師
中郎將使督零陵桂陽長沙三郡調其賦稅以充軍實建
安十六年益州牧劉璋遣法正迎先主使擊張魯亮與譙
羽鎮荊州先主自葭萌還攻璋亮與張飛趙雲等率衆泝

江分定郡縣與先主共圍成都成都平以亮爲軍師將軍
署左將軍府事先主外出亮常鎮守成都足食足兵二十
六年羣下勸先主稱尊號先主未許亮說先主卽帝位先
主乃策亮爲丞相曰朕遭家不造奉承大統兢兢業業不
敢康寧思靖百姓懼未能綏於戲丞相亮是悉朕意無怠
輔朕之闕助宣重光以照明天下君其勗哉亮以丞相錄
尚書事假節張飛卒後領司隸校尉章武三年春先主于
永安病篤召亮于成都屬以後事謂亮曰君才十倍曹丕
必能安國終定大事若嗣子可輔輔之如其不才君可自
取亮涕泣曰臣敢竭股肱之力效忠貞之節繼之以死先
主又爲詔勅後主曰汝與丞相從事事之如父建興元年
封亮武鄉侯開府治事頃之又領益州牧政事無巨細咸
決于亮南中諸郡並皆叛亂亮以新遭大喪故未便加兵

氏姓譜

卷百四十九

六魚

諸葛氏

五

且遣使聘吳因結和親遂爲與國三年春亮率衆南征其
秋悉平軍資所出國以富饒乃治戎講武以俟大舉五年
率諸軍北駐漢中臨發上疏遂行屯于沔陽六年春揚聲
由斜谷道取郿使趙雲鄧芝爲疑軍據箕谷魏大將軍曹
真舉衆拒之亮身率諸軍攻祁山戎陣整齊賞罰肅而號
令明南安天水安定三郡叛魏應亮關中響震魏明帝西
鎮長安命張郃拒亮亮使馬謖督諸軍在前與郃戰于街
亭謖違亮節度舉動失宜大爲郃所破亮拔西縣千餘家
還于漢中戮謖以謝衆上疏曰臣以弱才叨竊非據親秉
旄鉞以厲三軍不能訓章明法臨事而懼至有街亭違命
之闕箕谷不戒之失咎皆在臣授任無方臣明不知人恤
事多闇春秋責帥臣職是當請自貶三等以督厥咎于是
以亮爲右將軍行丞相事所總統如前冬亮復出散關圍

陳倉曹真拒之亮糧盡而還魏將王雙率騎追亮亮與戰
賊之斬雙七年亮遣陳式攻武都陰平魏雍州刺史郭淮
率衆欲攻式亮自出至建威淮退還遂平二郡詔策亮曰
街亭之役咎由馬謖而君引愆深自貶抑重違君意聽順
所守前年耀師馘斬王雙今歲爰征郭淮遁走降集氐羌
興復二郡威震凶暴功勲顯然方今天下騷擾元惡未梟
君受大任幹國之重而久自挹損非所以光揚洪烈矣今
復君丞相君其勿辭九年亮復出祁山以木牛運糧盡退
軍與魏將張郃交戰射殺郃十二年春亮悉大衆由斜谷
出以流馬運據武功五丈原與司馬宣王對于渭南亮每
患糧不繼使已志不伸是以分兵屯田爲久住之基耕者
雜于渭濱居民之間而百姓安堵軍無私焉相持百餘日
其年八月亮疾病卒于軍時年五十四及軍退宣王案行

氏姓譜

卷百四十九

六魚

諸葛氏

六

其營壘處所曰天下奇才也亮遺命葬漢中定軍山因山
爲墳冢足容棺斂以時服不須器物詔策曰惟君體資交
武明叡篤誠受遺託孤匡輔朕躬繼絕興微志存靖亂爰
整六師無歲不征神武赫然威震八荒將建殊功于季漢
參伊周之巨勲如何不弔事臨垂克遽疾隕喪朕用傷悼
肝心若裂夫崇德序功紀行命諡所以光昭將來刊載不
朽今使使持節左中郎將杜瓊贈君丞相武侯印綬諡
君爲忠武侯魂而有靈嘉茲寵榮嗚呼哀哉嗚呼哀哉初
亮自表後主曰成都有桑八百株薄田十五頃子弟衣食
自有餘饒至于臣在外任無別調度隨身衣食悉仰于官
不別治生以長尺寸若臣死之日不使內有餘帛外有贏
財以負陛下及卒如其所言亮性長于巧思損益連弩木
牛流馬皆出其意推演兵法作八陣圖咸得其要云亮言

教書奏多可觀別爲一集景耀六年春詔爲亮立廟于沔陽秋魏鎮西將軍鍾會征蜀至漢川祭亮之廟令軍士不得于亮墓所左右芻牧樵採亮弟均官至長水校尉亮子瞻嗣爵

諸葛瑾字子瑜瑾少游京師治毛詩尚書左氏春秋遭母憂居喪至孝事繼母恭謹甚得人子之道漢末避亂江東值孫策卒孫權姊壻曲阿宏咨見而異之薦之于權與魯肅等並見賓待後爲權長史轉中司馬建安二十年權遣瑾使蜀通好先主與其弟亮俱公會相見退無私面與權談說諫喻未嘗切愕微見風彩粗陳指歸如有未合則捨而及他徐復託事造端以物類相求于是權意往往而釋吳郡太守朱治權舉將也權曾有以望之而素加敬難自詰讓忿忿不解瑾揣知其故而不敢顯陳乃乞以意私自

氏姓譜

卷百四十九

六魚

諸葛氏

七

問遂于權前爲書泛論物理因以已心遙往忖度之畢以呈權權喜笑曰孤意解矣顏氏之德使人加親豈謂此邪權又怪校尉殷模罪至不測羣下多爲之言權怒益甚與相反覆惟瑾默然權曰子瑜何獨不言瑾避席曰瑾與殷模等遭本州傾覆生類殄盡棄墳墓攜老弱披草萊歸聖化在流隸之中蒙生成之福不能躬相督厲陳答萬一至令模孤負恩惠自陷罪戾臣謝過不暇誠不敢有言權聞之愴然乃曰特爲君赦之後從討鬪羽封宣城侯以緩南將軍代呂蒙領南郡太守往公安先主東伐吳吳王求和瑾與先主牋曰奄聞旗鼓來至白帝或恐議臣以吳王侵取此州危害鬪羽怨深禍大不宜答和此用心于小未留意于大者也試爲陛下論其輕重及其大小陛下若抑威損忿斲省瑾言者計可立決不復咨之于羣后也陛下

關羽之親何如先帝荆州大小孰與海內俱應仇疾誰當
先後若審此數易如反掌時或言瑾別遣親人與先主相
聞權曰孤與子瑜有死生不易之誓子瑜之不負孤猶孤
之不負子瑜也黃武元年遷左將軍督公安假節封宛陵
侯虞翻以狂直流徙惟瑾屢爲之說翻與所親書曰諸葛
敦仁則天活物比蒙清論有以保分惡積罪深見忌殷重
雖有祁老之救德無羊舌解釋難冀也瑾爲人有容貌思
度于時服其宏雅權亦重之凡大事咨訪權稱尊號拜大
將軍左都護領豫州牧及呂壹誅權又有詔切磋瑾等瑾
輒因事以答辭順理正瑾子恪名盛當世權深器異之然
瑾常嫌之謂非保家之子每以憂戚赤烏四年年六十八
卒遺命令素棺歛以時服事從省約恪已自封侯故弟融
襲爵

氏姓譜

卷百四十九

六魚

諸葛氏

諸葛恪字元遜少有才名發藻岐嶷辯論應機莫與爲對
權見而奇之謂瑾曰藍田生玉真不虛也身長七尺六寸
少鬚眉折頰廣額大口高聲弱冠拜騎都尉與顧譚張休
等侍太子登講論道藝並爲賓友從中庶子轉爲左輔都
尉恪父瑾面長似驢孫權大會羣臣使人牽一驢入長檢
其面題曰諸葛子瑜恪跪曰乞請筆益兩字因聽與筆恪
續其下曰之驢舉坐歡笑乃以驢賜恪他日復見權問恪
曰卿父與叔父孰賢對曰臣父爲優權問其故對曰臣父
知所事叔父不知以是爲優權又大噓命恪行酒至張昭
前昭先有酒色不肯飲曰此非養老之禮也權曰卿其能
令張公辭屈乃當飲之耳恪難昭曰昔師尚父九十秉旌
仗鉞猶未告老也今軍旅之事將軍在後酒食之事將軍
在先何謂不養老也昭卒無辭遂爲盡爵後蜀使至羣臣

竝會權謂使曰此諸葛恪雅好騎乘還告丞相爲致好馬
恪因下謝權曰馬未至而謝何也恪對曰夫蜀者陛下之
外虜今有恩詔馬必至也安敢不謝恪之才捷皆此類也
權甚異之欲試以事令守節度節度掌軍糧穀文書繁猥
非其好也恪以丹陽山險民多果勁雖前發兵徒得外縣
平民而已其餘深遠莫能禽盡屢自求乞爲官出之三年
可得甲士四萬餘人權拜恪撫越將軍領丹陽太守授檠
戟武騎三百拜畢命恪備威儀作鼓吹導引歸家時年三
十二恪到府乃移書四部屬城長吏令各保其疆界明立
部武其從化平民悉令屯居乃分內諸將羅兵幽阻但繕
藩籬不與交鋒候其穀稼將熟輒縱兵芟刈使無遺種舊
穀旣盡新田不收平民屯居畧無所入于是山民飢窮漸
出降首恪乃復勅下曰山民去惡從化皆當撫慰徙出外

氏姓譜

卷百四十九

六魚

諸葛氏

九

縣不得嫌疑有所執拘曰陽長胡伉得降民周遺遺舊惡
民困迫暫出內圖叛逆伉縛送言府恪以伉違教遂斬以
徇以狀表上民間伉坐執人被戮知官惟欲出之而已于
是老幼相攜而出歲期人數皆如本規恪自領萬人餘分
給諸將權嘉其功遣尙書僕射薛綜勞軍綜先移恪等曰
山越恃阻不賓歷世緩則首竄急則狼顧皇帝赫然命將
西征神策內授武師外震兵不爍鏑甲不沾汗元惡旣梟
種黨歸義蕩滌山藪獻戎十萬野無遺寇邑罔殘姦旣掃
兇慝又充軍用藜藜稂莠化爲善草魍魎更成虎士
雖實國家威靈之所加亦信元帥臨履之所致也雖詩美
執訊易嘉折首周之方名漢之衛霍豈足以談功軼古人
動超前世主上歡然遙用歎息感四牡之遺典思飲至之
舊章故遣中臺近官迎致犒賜以旌茂功以慰劬勞拜恪

威北將軍封都鄉侯恪乞率衆佃廬江皖口因輕兵襲舒掩得其民而還復遠遣斥候觀相徑要欲圖壽春權以爲不可赤烏中魏司馬宣王謀欲攻恪權方發兵應之望氣者以爲不利于是徙恪屯于柴桑與丞相陸遜書恪知遜以此嫌已故遂廣其理而贊其旨也會遜卒恪遷大將軍假節駐武昌代遜領荊州事久之權不豫而太子少乃徵恪以大將軍領太子太傅中書令孫宏領少傅權疾因召恪宏及太常滕胤將軍呂據侍中孫峻屬以後事翌日權薨宏素與恪不平懼爲恪所治秘權死問欲矯詔除恪峻以告恪恪請宏咨事于坐中誅之乃發喪制服與弟公安督融書曰今月十六日乙未大行皇帝委乘萬國羣下大小莫不傷悼至吾父子兄弟竝受殊恩非徒凡庸之隸是以悲慟肝心圯裂皇太子以丁酉踐尊號哀喜交并不知

氏姓譜

卷百四十九

六魚

譜葛氏

十

所措吾身受顧命輔相幼主竊自揆度才非博陸而受姬公負圖之託懼忝丞相輔漢之效恐損先帝委付之明是以憂慙惶惶所慮萬端且民惡其上動見瞻觀何時易哉今以頑鈍之姿處保傅之位艱多智寡任重謀淺誰爲唇齒近漢之世燕蓋交邁有上官之變以身值此何敢怡豫邪又弟所在與賊犬牙相錯當于今時整頓軍具率厲將士警備過常念出萬死無顧一生以報朝廷無忝爾先又諸將備守各有境界猶恐賊虜聞諱恣睢竊邊邑諸曹已別下約勅所部督將不得妄委所成徑來奔赴雖懷愴恒不忍之心公義奪私伯禽服戎若苟違戾非徒小故以親正疏古人明戒也恪更拜太傅于是罷視聽息校官原逋責除闕稅事崇恩澤衆莫不悅恪每出入百姓延頸思見其狀初權黃龍元年遷都建業二年築東興堤遏湖水

後征淮南敗以內船由是廢不復修恪以建興元年十月會衆于東興更作大堤左右結山俠築兩城各留千人使全端留畧守之引軍而還魏以吳軍入其疆土恥于受侮命大將胡遵諸葛誕等率衆七萬欲攻圍兩塢圖壞隄遏恪與軍四萬晨夜赴救遵等勅其諸軍作浮橋度陣于隄上分兵攻兩城城在高峻不可卒拔恪遣將軍留贊呂據唐咨丁奉爲前部時天寒雪魏諸將會飲見贊等兵少而解置鎧甲不持矛戟但兜鍪刀楯裸身緣過大笑之不卽嚴兵兵得上便鼓譟亂斫魏軍驚擾散走爭渡浮橋橋壞絕自殺于水更相蹈藉樂安太守桓嘉等同時并沒死者數萬故叛將韓綜爲魏前軍督亦斬之獲車乘牛馬驢騾各數千資器山積振旅而歸進封恪陽都侯加荆揚州牧督中外諸軍事賜金一百斤馬二百匹繒布各萬疋恪遂

氏姓譜

卷百四十九

六魚

諸葛氏

十一

有輕敵之心以十二月戰克明年春復欲出軍諸大臣以爲數出罷勞同辭諫恪恪不聽中散大夫蔣延或以固爭扶出恪乃著論諭衆衆皆以恪此論欲必爲之辭然莫敢復難丹陽太守聶友素與恪善書諫恪恪不納尋迴軍還圍新城攻守連月城不拔士卒疲勞因暑飲水泄下流腫病者大半死傷塗地諸營吏曰白病者多恪以爲詐欲斬之自是莫敢言恪內惟失計而恥城不下忿形于色將軍朱異有所是非恪怒立奪其兵都尉蔡林數陳軍討恪不能用策馬奔魏魏知戰士罷病乃進救兵恪引軍而去士卒傷病流曳道路或頓仆坑壑或見畧獲存亡忿痛大小呼嗟而恪晏然自若出住江渚一月圖起田于潯陽詔召相銜徐乃旋師由此衆庶失望而怨躡與矣秋八月軍還陳兵導從歸入府館卽召中書令孫臏厲聲謂曰卿等何

敢妄數作詔嘿惶懼辭出因病還家恪征行之後曹所奏
署令長職司一罷更選愈治威嚴多所罪責常進見者無
不竦息又改易宿衛用其親近復勅兵嚴欲向青徐孫峻
因民之多怨衆之所嫌構恪欲爲變與亮謀置酒請恪恪
將見之夜精爽擾動夕不寐明將盥漱聞水腥臭侍者
授衣衣服亦臭恪怪其故易衣易水其臭如初意惆悵不
悅嚴畢趨出犬銜引其衣恪曰犬不欲我行乎還坐頃刻
乃復起犬又銜其衣恪令從者逐犬遂升車初恪將征淮
南有孝子著縗衣入其閭中從者白之令外詰問孝子曰
不自覺入時中外守備亦悉不見衆皆異之出行之後所
坐廳事屋棟中折自新城出住東興有白虹見其船還拜
蔣恪不時入事泄自出見恪曰使君若尊體不安白可須

氏姓譜

卷百四十九

六魚

諸葛氏

十一

後峻當具白主上欲以嘗知恪恪答曰當自力入散騎常
侍張約朱恩等密書與恪曰今日張設非常疑有他故恪
省書而去未出路門逢太常滕胤恪曰卒腹痛不任入胤
不知峻陰計謂恪曰君自行旋未見今上置酒請君君已
至門宜當力進恪躊躇而還劍履上殿謝亮還坐設酒恪
疑未飲峻因曰使君病未善平當有常服藥酒自可取之
恪意乃安別飲所齋酒酒數行亮還內峻起如廁解長衣
著短服出曰有詔收諸葛恪恪驚起拔劍未得而峻刀交
下張約從旁斫峻裁傷左手峻應手斫約斷右臂武衛之
士皆趨上殿峻曰所取者恪也今已死悉令復刃乃除地
更飲先是童謠曰諸葛恪蘆葦單衣箴鉤落於何相求成
子閣成子閣者反語石子岡也建業南有長陵名曰石子
岡塋者依焉鉤落者校飾草帶世謂之鉤絡帶恪果以葦

席裊其身而篋束其腰投之于此同恪長子裨騎都尉以交闔魯王事權遣付恪令更教誨恪鳩殺之中子竦長水校尉少子建步兵校尉聞恪誅車載其母而走峻遣騎督劉承追斬竦于白都建得渡江欲北走魏行數十里爲追兵所逮恪外甥都鄉侯張震及常侍朱恩等皆夷三族初竦數諫恪不從常憂懼禍及亡臨淮臧均表乞收葬恪于是亮峻聽恪故吏斂葬遂求之于石子岡始恪退軍還聶友知其將敗書與滕胤曰當人強盛河山可拔一朝羸縮人情萬端言之悲歎及恪誅後孫峻忌友欲以爲鬱林太守友發病憂死

諸葛喬字伯松瑾之第二子也本字仲慎與兄元遜俱有名于時論者以爲喬才不及兄而性業過之初亮未有子求喬爲嗣瑾啟孫權遣喬來西亮以喬爲已適子故易其氏姓譜

卷百四十九

六魚

諸葛氏

三

字焉拜爲駙馬都尉隨亮至漢中年二十五建興元年卒子攀官至行護軍翊武將軍亦早卒諸葛恪見誅于吳子孫皆盡而亮自有胄裔故攀還復爲瑾後

諸葛瞻字思遠建興十二年亮出武功與兄瑾書曰瞻今已八歲聰慧可愛嫌其早成恐不爲重器耳年十七尙公主拜騎都尉其明年爲翰林中郎將屢遷射聲校尉侍中尙書僕射加軍師將軍瞻工書畫強識念蜀人追思亮咸愛其才敏每朝廷有一善政佳事雖非瞻所建倡百姓皆傳相告曰葛侯之所爲也是以美聲溢譽有過其實景耀四年爲行都護衛將軍與輔國大將軍南鄉侯董厥並平尙書事六年冬魏征西將軍鄧艾伐蜀自陰平由景谷道旁入瞻督諸軍至涪亭住前鋒破退還住綿竹艾遣書誘瞻曰若降者必表爲琅邪王瞻怒斬艾使遂戰大敗臨陣

死時年三十七衆皆離散艾長驅至成都瞻長子尚與瞻俱沒次子京及攀子顯等咸熙元年內移河東

諸葛尚瞻長子初魏征西將軍鄧艾伐蜀瞻督諸軍至涪與艾戰大敗死尚歎曰父子荷國重恩不早斬黃皓以致傾敗用生何爲乃馳赴魏軍而死弟京咸熙中內徙河東入晉位至江州刺史

晉

諸葛恢字道明琅邪陽都人也祖誕魏司空爲文帝所誅父靚奔吳爲大司馬吳平逃竄不出武帝與靚有舊靚姊又爲琅邪王妃帝知靚在姊間因就見焉靚逃于廁帝又逼見之謂曰不謂今日復得相見靚流涕曰不能漆身皮面復覩聖顏詔以爲侍中固辭不拜歸于鄉里終身不向朝廷而坐恢弱冠知名試守卽邱長轉臨沂令爲政和平

氏姓譜

卷百四十九

六魚 諸葛氏

志

值天下大亂避地江左名亞王導庾亮導嘗謂曰明府當爲黑頭公及導拜司空恢在坐導指冠謂曰君當復著此導嘗與恢戲爭族姓曰人言王葛不言葛王恢曰不言馬驢而言驢馬豈驢勝馬邪其見親狎如此于時潁川人荀闓字道明陳留蔡謨字道明與恢俱有名譽號曰中興三明人爲之語曰京都三明各有名蔡氏儒雅荀葛清元帝爲安東將軍以恢爲主簿再遷江寧令討周馥有功封博陵亭侯復爲鎮東參軍與卞壺竝以時譽遷從事中郎兼統記室時四方多務踐疏殷積恢斟酌酬答咸稱折中于時王氏爲將軍而恢兄弟及顏含竝居顯要劉超以忠謹掌書命時人以帝善任一國之才愍帝卽位徵用四方賢雋召恢爲尚書郎元帝以經緯須才上疏留之承制調爲會稽太守臨行帝爲置酒謂曰今之會稽昔之闕中足食

足兵在千良守以君有蒞任之方是以相屈四方分崩當
匡振圯運政之所先君爲言之慨陳謝因對曰今天下喪
亂風俗陵遲宜遵五美屏四惡進忠實退浮華帝深納焉
太興初以政績第一詔曰自頃多難官長數易益有諸弊
雖聖人猶久于其道然後化成况其餘乎漢宣帝稱與我
其安天下者其惟良二千石斯言信矣是以黃霸等或十
年或二十年而不徙所以能濟其中興之勲也賞罰黜陟
所以明政道也會稽內史諸葛恢蒞官三年政清人和爲
諸郡首宜進其位班以勸風教今增恢秩中二千石頃之
以母憂去官服闋拜中書令王敦上恢爲丹陽尹以久疾
免明帝征敦以恢爲侍中加奉車都尉討王含有功進封
建安伯以先爵賜次子儼爲闕內候又拜恢後將軍會稽
內史徵爲侍中遷左民尚書武陵王師吏部尚書累遷尙

氏姓譜

卷百四十九

六角

諸葛氏

五

書右僕射加散騎常侍銀青光祿大夫領選本州大中正
尚書令常侍吏部如故成帝踐阼加侍中金紫光祿大夫
卒年六十二贈左光祿大夫儀同三司賻贈之禮一依太
尉興平伯故事謚曰敬祠以太牢子魁嗣位至散騎常侍
恢兄頤字道回亦爲元帝所器重終于太常

南史

諸葛璩字幼瓊邪陽都人世居京口璩幼事徵士闕康
之博涉經史復師徵士臧榮緒榮緒著晉書稱璩有發摘
之功方之壺遂齊建武初南徐州行事江祀薦璩于明帝
曰璩安貧守道悅禮敦詩未嘗投刺邦宰曳裾府寺如其
簡退可以揚清厲俗請辟爲議曹從事帝許之璩辭不去
陳郡謝朓爲東海太守教曰昔長孫東組降龍邱之節文
舉北轡高通德之稱所以激貪立懦式揚風範處士諸葛

據高風所漸結轍前修豈懷珠披褐韜玉待價將幽貞獨
往不事王侯者邪聞事親有啜菽之寔就養寡藜蒸之給
豈得獨享萬鍾而忘茲五乘可餉穀百斛天監中太守蕭
琛刺史安成王秀鄱陽王恢竝禮異焉據丁母憂毀瘠慙
累加存問服闋舉秀才不就據性勤于誦誘後生就學者
日至居宅狹陋無以容之太守張友爲起講舍據處身清
正妻子不見喜愠之色旦夕孜孜講誦不輟時人益以此
宗之七年武帝敕問太守王份份卽具以實對未及徵用
是年卒于家據所著文章二十卷門人劉暉集而錄之

宋

諸葛廷瑞字麟之南安人紹興二十七年進士孝宗褒之

氏姓譜

卷百四十九

六魚

諸葛氏

六

曰卿人材磊落議論正直他日當爲國立事御札擢起居
舍人充弔祭金國使虜伴使以三節人衣帶服飾爲非請
易之詰難數四廷瑞曰高宗升遐北朝遣使弔祭純用吉
服本朝惡其非禮今已易服帶而來他豈敢擅虜露刃驛
庭恐以禍福廷瑞厲聲曰臣子之心有死無二豈遑他恤
虜不能奪爲之加禮使還除兼吏部侍郎

諸葛直清

字子嚴兵部侍郎廷瑞長子以父任歷海口鎮

主管南外睦宗院知海陽縣通判廣州潮多水患諭衆修
新堤以捍田利十倍勸成義役人甚便之祠官凡十二任
終奉直大夫

諸葛說

字寧叟永嘉人從其舅草堂先生學弱冠入太學

登紹興第丁父母艱慨祿養不逮于是退以學力行于家

名其圃曰良圃室曰休室州縣有恤政悉咨之而後行晚

年授長樂簿卒于官陳君舉銘其墓

明

諸葛平陽朔人洪武間爲應城知縣廉能愛民均徭簡賦吏服其威民安其惠

諸葛伯衡太平鄉人少清介持名節從鄉先生游獲聞前輩緒論精求實踐鄉里咸推重之洪武初以薦授北平雜造局大使不以家累自隨出入無車馬遇雨輒草履行泥途中弗厭也遷隨州吏目州有建峯廟廟有青蛇惑人凡入人家必有禍伯衡殺青蛇罪巫者民以不惑以左春坊大學士董倫薦召問治道對以聖明之世紀綱正而法度修民皆安業但廉恥之道輕耳上大悅擢陝西參議

樗里氏

嬴姓秦丞相樗里子之後

氏姓譜

卷百四十九

六魚

樗里氏

七

歷代名賢

周

樗里子名疾秦惠王之弟也與惠王異母母韓女也樗里子滑稽多智秦人號曰智囊秦惠王八年爵樗里子右更使將而伐曲沃盡出其人取其城地入秦秦惠王二十五年使樗里子爲將伐趙擄趙將軍莊豹拔藺明年助魏章攻楚敗楚將屈丐取漢中地秦封樗里子號爲嚴君秦惠王卒太子武王立逐張儀魏章而以樗里子甘茂爲左右丞相秦使甘茂攻韓拔宜陽使樗里子以車百乘入周周以卒迎之意甚敬楚王怒讓周以其重秦客游騰爲周說楚王曰智伯之伐仇猶遣之廣車因隨之以兵仇猶遂亡何則無備故也齊桓公伐蔡號曰誅楚其實襲蔡今秦虎狼之國使樗里子以車百乘入周周以仇猶蔡觀故使長

戰居前強弩在後名曰衛疾而實囚之且夫周豈能無憂其社稷哉恐一旦亡國以憂大王楚王乃悅秦武王卒昭王立樛里子又益尊重昭王元年樛里子將伐蒲蒲守恐請胡衍胡衍爲蒲謂樛里子曰公之攻蒲爲秦乎爲魏乎爲魏則善矣爲秦則不爲賴矣夫衛之所以爲衛者以蒲也今伐蒲入于魏衛必折而從之魏亡西河之外而無以取者兵弱也今并衛于魏魏必強魏強之日西河之外必危矣且秦王將觀公之事害秦而利魏王必罪公樛里子曰奈何胡衍曰公釋蒲勿攻臣試爲公入言之以德衛君樛里子曰善胡衍入蒲謂其守曰樛里子知蒲之病矣其言曰必拔蒲衍能令釋蒲勿攻蒲守恐因再拜曰願以請因劾金三百斤曰秦兵苟退請必言子於衛君使子爲南面故胡衍受金于蒲以自貴于衛于是遂解蒲而去還擊

氏姓譜

卷百四十九

六魚

樛里氏

六

皮氏皮氏未降又去昭王七年樛里子卒葬于渭南章臺之東曰後百歲是當有天子之宮夾我墓樛里子疾室在于昭王廟西渭南陰鄉樛里故俗謂之樛里子至漢興長樂宮在其東未央宮在其西武庫正直其墓秦人諺曰功則任鄙智則樛里

閭邱氏

志籍不言所出然邾國有閭邱杜預云高平南陽縣北有顯澗亭本邾地爲齊所并往往閭邱氏食邑於此故以命氏釋例公子譜皆畧惟世本詳焉蓋春秋閭邱嬰之後也

歷代名賢

閭

閭邱嬰齊莊公近臣崔杼弑莊公嬰以帷縛其妻而載之

與申鮮虞乘而出鮮虞推而下之曰君昏不能匡危不能
救死不能死而知匿其暱其誰納之行及奔中將舍嬰曰
崔慶其追我鮮虞曰一與一誰能懼我遂舍枕轡而寢食
馬而食駕而行出奔中謂嬰曰速驅之崔慶之衆不可當
也遂奔魯僕賃于野以喪莊公楚人召鮮虞鮮虞如楚爲
右尹鮮虞子傅摯亦事莊公以武力聞崔慶敗嬰復于齊
景公四年公孫薑放高止于北燕其子豎以盧叛嬰帥師
圍盧魯奔晉六年公孫薑害嬰欲殺之使帥師伐陽州魯
問師故薑殺嬰以說于魯師嬰子閻邱明悼公三年我及
魯平明如魯蒞盟且逆季姬以歸六年魯會吳伐我宗樓
將下軍與明相厲及戰于艾陵明死之

閻邱明齊人年十八道遮宣王曰家貧親老願得小仕王
曰子年尚稚未可對曰顓頊十二而治天下項橐七歲爲

氏姓譜 卷百四十九 六魚 閻邱氏 十九

聖人師由此觀之邛不肖耳年不稚矣宣王曰未有咫角
驂駒而能服重致遠者也士亦華髮墮顛而後可用耳對
曰不然夫驂騮綠驥駿馬也誠于釜竈之間其疾未能過
狸鮑黃鵠白鶴一舉千里試于堂廡之下其便未能過燕
服翼辟閻巨闕利器也使之決目出昧其便未能過管橐
由此觀之華髮墮顛與邛何以異哉宣王曰善子何見寡
人之晚也對曰夫雞豚謹噉奪鐘鼓之異雲霞充咽奪日
月之光讒人在側是以見晚也宣王拊軾曰寡人有過載
之歸而用焉

閻邱先生齊宣王獵于社山社山父老十三人相與勞王
王賜父老田不租父老皆拜閻邱先生不拜王曰以爲少
邪賜父老無徭役父老皆拜閻邱先生又不拜王曰拜者
去不拜者前曰寡人賜田不租賜無徭役先生獨不拜寡

人得無有過乎閻邱先生對曰閻王來游所以爲勞王望
得壽于王得富于王得貴于王王曰天生殺有時非寡人
所得與無以壽先生倉廩空虛旱澇苗害無以富先生大
官無缺小官卑賤無以貴先生對曰此非臣之所敢望也
願王選有修行者以爲吏乎其法度臣可以得壽振之以
時無煩擾百姓臣可以得富令少者敬長長者敬老臣可
以得貴今王幸賜田不租則倉廩將虛也賜無徭役則官
府無使焉此非臣之所敢望也王曰善願以先生爲

閻

閻邱卿魯人師事東海孟卿以治禮著名

閻邱宏官侍中順帝時拜其子爲郎

閻

閻邱均成都人以文章著名景龍中安樂公主薦拜太常

氏姓譜

卷百四十九

六魚

閻邱氏

二十

博士貶循州司倉參軍卒有集十卷

閻邱方遠字大方宿松人幼而辨慧年十六精通詩書學
易于廬山陳元晤昭宗累詔不起賜號妙有大師景福中
居餘姚大滌洞錢鏐奏號元同先生天復中尸解後有見
之仙都山

閻

閻邱昕字逢辰麗水人舉進士以廉稱爲義烏令有政績
除監察御史累遷吏部侍郎卒諡清簡

閻邱賓用隱于吳市耕以養其親尤力學好吟詠嘗跨牛

行且爲詩人遇之不測也雖田野悠悠有廉直不汚之操

閻邱觀字民表麗水人侗儻有大志宣和二十年睦州方

臘寇作賊首洪載據松邑攻遂昌勢張甚朝廷下諭安之

觀慨然請行以義滅賊成約而還授承信郎靖康初本路

師命部衛處葵三州兵赴霸州及還遇高宗渡江傾兵勤
王凡歷九任積官至武翼大夫

閻邱玉長洲人天順間瑞州推官

余邱氏

齊公族食采余邱後氏焉漢余邱炳侍御史余邱靈隱

士居曲河

漁陽氏

燕大夫受封漁陽因以為氏

於陵氏

姜姓風俗通云陳仲子居於陵自號於陵子後因氏焉

歷代名賢

氏姓譜

卷百四十九

六魚

余邱氏至

三

於陵子字子終齊人居楚齊楚有重邱之役也問于於陵

子曰齊子產也楚子居也今二國構兵子將奚直於陵子

曰古者諸侯擅誅伐天子得按其辜而輕重之然湯殲葛

桀未放也西伯戲黎紂未亡也彼所謂聖人者且首于而

靡悔焉矧蔑天子未有如今者乎昔者泰山與江漢爭王

兩京之下泰山矢曰弗讓吾飄塵以實彼溝澮且不為齊

主江漢亦矢曰弗汜吾淤瀝以蕩彼培塿且不為楚雄于

是有中州之蝸將起責其是非欲東之泰山會程三千餘

歲欲南之江漢亦會程三千餘歲因自量其齒則不過旦

暮之間于是悲憤莫勝而枯于蓬蒿之上為螻蟻所笑也

今天子且拱手不能按其輕重而一匹之夫欲起而議之
何異于中州之蝸為螻蟻所笑也

歷代列女

於陵氏婦楚於陵子終之妻也楚王聞於陵子終賢欲以爲相使使者持金百鎰往聘迎之於陵子終曰僕有箕箒之妾請入與計之卽入謂妻曰楚欲以我爲相遣使者持金來今日爲相明日結駟連騎食方丈于前可乎妻曰夫子織履以爲食非與物無治也左琴右書樂亦在其中矣夫結駟連騎所安不過容膝食方丈於前甘不過一肉今以容膝之安一肉之味而懷楚國之憂其可乎亂世多害妾恐先生之不保命也于是子終出謝使者而不許也遂相與逃而爲人灌園

於邱氏

其先家於邱因氏焉於邱略漢宛胸令

胥門氏

左傳吳大夫胥門巢之後也

氏姓譜

卷百四十九

六魚

於陵氏至

三

孺羊氏

左傳衛石碣宰孺羊肩

茹連氏

見姓譜明茹連回謙洪武中知長沙府

鮭陽氏

見姓譜鮭音珪漢有鮭陽鴻儒林傳作鮭陽

歷代名賢

鮭

鮭陽鴻字孟孫中山人以孟氏易教授有名稱永平中爲

少府

邠州氏

世本晉邠豹孫步陽生邠州因氏焉

舒蓼氏

世本舒蓼偃姓皋陶之後

諸梁氏

楚莊王之後食采諸梁因氏焉

渠邱氏

亦作著邱氏嬴姓莒國之君居于渠邱故謂之渠邱

賢傳彭城有渠邱氏

徐吾氏

左傳鄭大夫徐吾犯之後

徐盧氏

漢景帝時匈奴徐盧庸來降

舒子氏

偃姓僖公三年徐滅之子孫氏焉

舒堅氏

氏姓譜

卷百四十九

六魚

諸梁氏

三

潛夫論楚公族有舒堅文叔為大夫

舒鳩氏

子爵偃姓皋陶之後也襄公二十一年為楚所滅子孫

以國為氏望出鉅鹿

上平聲

七虞

虞邱氏

晉大夫虞邱子著書又史記曰楚有虞邱相進處士孫

叔敖相楚上下和合吏無姦邪遂霸諸侯

歷代明賢

南北

虞邱進字豫之東海鄉人也少時隨謝元討苻堅有功遂封關內侯後從宋武帝征孫恩頻戰有功從建鄴除燕國內史封龍川縣五等侯及盧循逼都孟昶等議奉天子

過江進廷議不可面折視等武帝甚嘉之除鄱陽太守後
隨劉藩斬徐道覆義熙九年以前後功封望蔡縣男永初
二年累遷太子右衛率明年卒官時年六十追論討司馬
休之功進爵爲子傳國至曾孫齊受禪國除

吾邱氏

吾音魚卽虞邱氏也

歷代名賢

吾邱壽王字子贛趙人也年少以善格五召待詔詔使從
中大夫董仲舒受春秋高材通明遷侍中中郎坐法免上
書謝罪願養馬黃門上不許後願守塞捍寇難復不許久
之上疏願擊匈奴詔問狀壽王對良善復召爲郎稍遷會
東郡盜賊起拜爲東郡都尉上以壽王爲都尉不復置太

氏姓譜

卷百四十九

七虞

虞邱氏至

四

守是時軍旅數發年歲不熟多盜賊詔賜壽王璽書責之
壽王謝罪因言其狀後徵入爲光祿大夫侍中丞相公孫
宏奏言民不得挾弓弩十賊曠弩百吏不敢前盜賊不輒
伏辜免脫者衆害寡而利多此盜賊所以蕃也禁民不得
挾弓弩則盜賊執短兵短兵接則衆者勝以衆吏捕寡賊
其勢必得盜賊有害無利則莫犯法刑措之道也臣愚以
爲禁民毋得挾弓弩便上下其議壽王對曰臣聞古者作
五兵非以相害以禁暴討邪也安居則以制猛獸而備非
常有事則以設守衛而施行陣及至周室衰微上無明王
諸侯力攻疆侵弱衆暴寡海內抗傲是以巧詐並生知者
陷愚勇者威怯苟以得勝爲務不顧義理故機變械飾所
以相賊害之具不可勝數于是秦兼天下廢王道立私議
滅詩書而首法令去仁恩而任刑戮墮名城殺豪傑銷甲

兵折鋒刃其後民以擾鉏耒相撻擊犯法滋衆盜賊不勝至于赭衣塞路羣盜滿山卒以亂亡故聖王務教化而省禁防知其不足恃也今陛下昭明德建太平舉俊材興學宮三公有司或由窮巷起白屋裂地而封宇內日化方外鄉風然而盜賊猶有者郡國二千石之罪非挾弓弩之過也禮曰男子生桑弧蓬矢以舉之明示有事也愚聞聖王合射以明教矣未聞弓矢之爲禁也且所爲禁者爲盜賊之以攻奪也攻奪之罪死然而不止者大姦之于重誅固不避也臣恐邪人挾之而吏不能止良民以自備而抵法禁是擅賊威而奪民救也竊以爲無益于禁姦而廢先王之典使學者不得習行其禮大不便書奏上以難丞相宏宏誦服焉及汾陰得寶鼎武帝嘉之薦見宗廟藏于甘泉宮羣臣皆上壽賀曰陛下得周鼎壽王獨曰非周鼎上

氏姓譜

卷百四十九

七虞

吾邱氏

三五

聞之召而問之曰今朕得周鼎壽王獨以爲非何也有說則可無說則死壽王對曰臣安敢無說臣聞周德始乎后稷長于公劉大于太王成于文武顯于周公德澤上昭天下漏泉無所不通上天報應鼎爲周出故名曰周鼎今漢自高祖繼周亦昭德顯行布恩施惠六合和同至于陛下恢廓祖業功德愈盛天瑞並至珍祥畢見昔秦始皇親出鼎于彭城而不能得天祚有德而寶鼎自出此天之所以與漢乃漢寶非周寶上曰善羣臣皆稱萬歲是日賜壽王黃金十斤後坐事誅

胡毋氏

風俗通云胡毋姓本陳胡公之後也公子完奔齊遂有齊國齊宣王毋弟別封毋鄉遠本胡公近取毋邑故曰

胡毋氏

胡毋生字子都齊人也治公羊春秋爲景帝博士與董仲舒同業仲舒著書稱其德年老歸教于齊齊之言春秋者宗事之公孫宏亦頗受焉

胡毋班字季皮太山奉高人少與山陽度尚東平張邈等八人並輕財赴義振濟人士世謂之八厨漢末住爲執金吾時董卓使班奉詔到河內解釋義兵班妻兄太守王匡受袁紹旨收班繫獄欲殺之以徇軍班與匡書云自古以來未有下土諸侯舉兵向京師者劉向傳曰擲鼠忌器器猶忌之况卓今處宮闕之內以天子爲藩屏幼主在宮如何可討僕與太傅馬公太僕趙岐少府陰修俱受詔命關東諸郡雖實嫉卓猶以銜奉王命不敢玷辱而足下獨囚

氏姓譜

卷百四十九

七虞

胡毋氏

六

僕于獄欲以擊鼓此悖暴無道之甚者也僕與董卓有何親戚義豈同惡而足下張狼虎之日吐長蛇之毒患卓遷怒何甚酷哉死人之所難然恥爲狂夫所害若亡者有靈常訴足下于皇天夫婚姻者禍福之機今日著矣曩爲一體今爲血讎亡人子二則君之甥身沒之後慎勿令臨僕尸骸也匡得書抱班二子而泣班遂死于獄

晉

胡毋原班曾孫練習兵馬山濤稱其才堪邊任舉爲太尉長史終河南令子輔之

胡毋輔之字彥國少擅高名有知人之鑒性嗜酒任縱不拘小節與王敦王澄庾敳俱爲太尉王衍所昵號曰四友澄普與人書曰彥國吐佳言如鋸木屑霏霏不絕誠爲後進領袖也辟別駕太尉掾並不就以家貧求試守繁昌令

始節酒自厲甚有能各遷尚書郎豫討齊王問賜爵陰平
男累轉司徒左長史復求外出爲建武將軍樂安太守與
郡人光逸晝夜酣飲不視郡事成都王頴爲太弟召爲中
庶子遂與謝鯤王澄阮修王尼畢卓俱爲放達嘗過河南
門下飲河南騶王子博箕坐其傍輔之叱使取火子博曰
我卒也惟不乏吾事則已安復爲人使輔之因就與語歎
曰吾不及也薦之河南尹樂廣廣召見甚悅之擢爲功曹
其甄拔人物若此東海王越聞輔之名引爲從事中郎復
補振威將軍陳留太守王彌經其郡輔之不能討坐免官
尋除寧遠將軍揚州刺史不之職越復以爲右司馬本州
大中正越薨避亂渡江元帝以爲安東將軍諮議祭酒遷
揚武將軍湘州刺史假節到州未幾卒時年四十九子謙
之

氏姓譜

卷百四十九

七虞

胡毋氏至

三七

胡毋謙之字子光才學不及父而傲縱過之至酣醉嘗呼
其父字輔之亦不以介意談者以爲狂輔之正酣飲謙之
闕而厲聲曰彥國年老不得爲爾將令我尻背東壁輔之
歡笑呼入與共飲其所爲如此年未三十卒

壺邱氏

列子師壺邱子林鄭人道德甚優列禦寇師事之

徒人氏

徒人回見左傳齊人

歷代名賢

問

徒人費齊襄公十二年公游于姑棼田于貝邱見大豕人
立而啼懼隊于車傷足喪屨反誅屨于徒人費弗得鞭之
見血走出適連稱管至父作亂遇之于門劫而束之費曰

我奚御哉袒而示之背信之費請先入伏公而出鬪死于門中石之紛如死于階下遂入殺孟陽于牀曰非君也不類見公之足於戶下遂弑公石之紛如孟陽皆齊小臣

屠羊氏

楚有屠羊說見韓詩內傳

胡非氏

媯姓陳胡公後有公子非其後子孫為胡非氏胡非子

戰國人著書

厨人氏

周禮厨人因官為氏

歷代名賢

厨人濮宋厨邑大夫也元公十一年華疆叛召華向華向

氏姓譜

卷百四十九

七虞

徒人氏至厨人氏

六

入以南里叛冬華登以吳師救華氏齊師時成宋濮曰軍志有之先人有奪人之心後人有待其衰盍及其勞且未定也伐諸若人而固則華氏眾矣悔無及也從之敗吳師于鴻口獲其二帥華登帥其餘復敗我師公欲出濮曰吾小人可藉死而不能送亡君請待之乃徇曰楊楸者公徒也眾從之公自楊門見之下而巡之曰國亡君死二三子之恥也豈專孤之罪也齊鳥枝鳴曰用少莫如齊致死齊致死莫如去備彼多兵矣請皆用劍從之華氏北復即之濮以裳裹首而荷以走曰得華登矣遂敗華氏于新里

呼延氏

匈奴四族有呼衍氏入中國改為呼延氏晋呼延報呼延平宋呼延遇太平登科呼延次升壽春人大觀登科呼延範邠州人大觀登科呼延連殿前左翼軍明呼延

迪四川人正統中福建參將呼延彥渭南人直隸贊皇知縣

歷代名賢

呼延贊太原人周淄川馬步都指揮使琮之子少爲驍騎卒太祖以其材勇補東班長遷驍雄軍使從討西川當前鋒身中數創以功補副指揮使太平興國初太宗親選軍校以爲鐵騎軍指揮使從征太原先登乘城及堞而墜者數四賜金帛獎之俄從崔翰戍定州擢馬步軍副都軍頭稍遷內員僚直都虞候獻陣圖兵要及樹營砦之策求頡邊任召見自陳武藝贊具裝執鞬馳騎揮鐵鞭棗槊旋繞廷中數四又引其四子必興必改必求必顯以入更迭舞劍盤槊各賜白金衣帶端拱二年領富州刺史加都軍頭

氏姓譜

卷百四十九

七虞

呼延氏至

元

盧蒲氏

迭刺保遼扶三州以不能治民改冀州副都部署康州團練使真宗嘗補軍校皆叙已功或至譴諱贊獨進曰臣月奉百千忝幸多矣不敢更求遷擢再拜而退元德皇太后園陵命掌護儀衛及還而卒贊有膽勇鷲悍輕率嘗言願死于敵徧文其體爲赤心殺賊字至妻孥僕使皆然諸子耳後刺日出門忘家爲國臨陣忘生爲主所作破陣刀降魔杵鐵折上巾兩傍有刃皆重數十斤絳帕首乘騅馬服飾詭異然性誕不近理冬月以水沃孩幼冀長耐寒而勁健其子病復刳股爲羹療之後必顯擢爲副都軍頭

蒲盧氏

姜姓蒲盧胥齊人善弋射

盧蒲氏

姜姓齊桓公之後左傳盧蒲就魁頃公之嬖人又盧蒲

癸莊公嬖臣又盧蒲癸公孫竈放之于北燕

徒單氏

見姓譜金元有此姓

歷代名賢

金

徒單合喜上京速蘇海永人世襲猛安蒲涅之子形貌魁偉膂力過人一經聞見終身不忘天輔間從婁室爲札也甚愛之天會六年以功爲謀克尋領婁室親管猛安帥府聞其才命權左翼軍事皇統二年爲隴州防禦使嘗敗宋人于高陵秦州鳳翔及饒風關宋兵至衆以寡勝之遷累平涼臨洮延安三尹時闕陝以西初去兵草百姓多失業惟守之以靜多還歸者天德二年爲陝西統軍使貞元二年兼河中尹正隆六年爲西蜀道兵馬都統世宗卽位其

氏姓譜

卷百四十九

七虞

徒單氏

三十

子弟皆自軍中來歸賜以手詔曰岐國失道殺其母后橫虐兄弟流毒兆庶朕惟祖宗創業艱難勉膺大位卿國家舊臣豈不知天道人事陝右重地非卿無能措畫卿軍不多領屯境上未宜深入俟兵革旣定卽當召卿復以爲統軍使未幾改元帥右都監表陳伐宋方畧許以便宜從事轉左都監押軍萬戶裴滿授刺猛安移刺沙里刺破宋兵于華州宋將吳璘兵十餘萬侵古鎮據散關和尚原神又口玉女潭大壘嶺石壁寨寶雞縣陷河州鎮戎軍表乞濟師益以河南兵萬人時德順受圍遣丹州刺史赤蓋胡速魯改以兵四千守之統軍都監石抹迭勒將兵萬人破宋河州兵還駐平涼求益兵以解德順之圍合喜遣萬戶完顏習尼列大良順寧州刺史顏蓋門都各將本部兵合二萬人押以順義軍節度使烏延蒲离黑與迭勒會璘聞使

偏將領兵五千來迎前鋒特里失烏也奚王和尚擊敗之
追至德順城南小溪邊璘自將大軍蔽岡阜而出烏也等
馳擊之迭勒蒲离黑繼至併力鏖戰日已暮兩軍不相辨
乃解已而兩國講和請各罷兵皆引還自圍城至是凡四
十餘日押軍猛安温敦蒲里海在圍中身先士卒力戰未
嘗少挫論功居多頃之璘復來犯陝西引軍十萬據險阻
剽掠郡邑復請益兵詔加以七千與舊號二萬遣慶陽尹
烏延蒲轄奴延安尹高景山分領以往節度使彰化軍璋
通遠軍烏延吾里補刺史寧州移刺高山奴恩州完顏謀
良虎京兆少尹宗室泥河皆備軍前任使宋兵五萬圍華
州押軍萬戶裴滿按刺欲堅壁守之猛安移刺沙里刺曰
宋兵雖多半是商虢華州并南山居民不習戰鬪不如擊
之按刺乃引騎兵千人敵宋前鋒追至大軍亦敗斬首五

氏姓譜

卷百四十九

七虞

從軍氏

三

千餘級宋成寶雞至大蟲嶺兵皆趣去旣而璘聞我兵已
去率兵復據德順陷鞏州臨洮府臨洮少尹紇石烈騷洽
死之詔贈一階賜錢五百貫時我兵甚少璘雖屢敗恃其
衆不肯去仍分其半守秦州合喜遣總管夾谷查刺與諸
將議破敵計策璋與門都言須都監親至敵必退合喜乃
領兵四萬駐水洛城東自六盤山西抵石山頭分兵守之
當德順秦州之兩間斷其餉道璘乃引去守德順張安撫
亦棄城趣速魯改邀擊之所殺過半擒將校十餘人遂復
德順秦州守兵亦退景山乃定商虢泥河復取環州而臨
洮秦鞏華河隴蘭會原洮積石鎮戎等州府一十六盡復
之陝西平詔書獎諭賜以玉帶將士各照等級遷資受賞
賄官賜錢有差時年已老上以陝西軍事委統軍使璋諭
以凡鎮防利害可訪問之七年入爲樞密副使改東京留

守賜以衣帶佩刀九年拜平章政事封定國公奏廢宗收
復陝西功數事命藏秘府十年合喜薨上罷擊鞠祭塋致
禮賻銀絹重綵二十一年遷其孫三合武功將軍襲本猛
安曷懶若窟申謀克泰和元年配享世宗廟庭

徒單鎰本名按出上京路速速保子猛安人北京副留守
焉輦之子七歲穎悟絕倫習女直字大定中詔翰林侍講
學士徒單子溫以女直字譯貞觀政要白氏策林史記西
漢等書頒行四方選諸路學生三十餘人教以古書鎰在
選中最號精詣兼通契丹大小字及漢字該習經史久之
樞密完顏思敬請教女直人舉進士尙書省議准初設科
目免鄉府兩試其禮部廷試止對策一道限五百字以上
待成日在京設國子學諸路設府學並以新進士充教授
士民子弟願學者聽歲久入學者衆卽同漢人進士三年

氏姓譜

卷百四十九

七虞

徒單氏

三

一試九年八月詔策女直進士問以求賢爲治之道侍御
史完顏蒲渚博士李晏翰林應奉阿不罕德甫移刺傑中
都路都轉運副奚頤考試鎰等二十七人及第上三人授
兩官爲中都路教授四名以下授一官除各路教授選鎰
爲國子助教嘗與左丞相良弼談論深加禮敬母憂起復
改國史編修世宗嘗問完顏守道徒單鎰何如人對曰容
止溫雅其心平易兼有材力可任政事上曰然當以劇任
處之久之兼修起居注累遷翰林待制兼右司員外郎獻
漢光武中興賦帝大悅曰不設此科安得此人章宗卽位
遷左諫議大夫兼吏部侍郎明昌元年爲御史中丞無何
拜參知政事兼修國史章宗銳意治平鎰上書進尙書右
丞三年罷爲橫海軍節度使上疑判定武軍鄭王永貽判
平陽府鎰王永中有黨命鎰節度定武三年轉上京留守

五年上問宰臣鎰與崇浩孰優平章張萬公對曰皆才能之士鎰有執守似優崇浩但多數耳上曰何謂多數萬公曰臣觀崇浩微似趨合上曰卿言是也頃之拜鎰平章政事封濟國公上以烈風昏瞠連日詔問變異之由時淑姬李氏內寵過盛兄弟橫恣鎰上疏言皆切時弊上雖納其說而不能行又問漢高帝光武優劣對曰光武再造漢業在位三十年無沈湎冒色之事高祖滅戚姬卒至于亂由是言之光武似優其言皆寓微諫上爲默然秦和四年罷知咸平府五年改南京留守六年徙知河中兼陝西安撫使初授元帥僕散揆節制上思徵用謀臣升宣撫使一品改鎰知京兆府事充宣撫使陝西元帥府並授節制七年吳曦死宋安丙分兵出秦隴間十月詔鎰出兵金房以分掣宋人梁益漢沔兵勢鎰遣行軍都統幹勒葉祿瓦副統

氏姓譜

卷百四十九

七虞

徒庫氏

三三

范回海完顏攔刺引步騎五千由商州十一月葉祿瓦拔鶻嶺關攔刺別將攻破燕子關新道口回海取小澗關敖倉至營口鎮破宋兵千餘追至上津縣斬首八百級遂取上津葉祿瓦破宋兵二千于平溪將趣金州宋王補議和詔鎰退軍守鶻嶺關八年正月丙遣景統領由栢子溪新道口朱砂谷來襲諸將擊走之斬統領于陣是歲罷兵鎰遷特進賜賚有差改知真定府事衛王立加儀同三司封濮國公改東京留守過關入見諭以兩朝舊德欲用爲相因太尉匡乃卿門人不可屈下進階開府儀同三司佩金符充遼東安撫副使大安三年改上京留守中都事亟徵拜尙書右丞相監修國史上言自用兵以來彼聚而行我散而守以聚攻散其敗必然不若入保大城併力備禦昌桓撫三州素號富貴人皆勇健可以內徙益我兵勢人畜

貨財不至亡失乎章移刺參政梁瑩曰如此是自蹙境土也衛王以責鑰復奏遼東國家根本距中都數千里萬一受兵州府顧望必須報可誤事多矣可遣大臣行省以鎮之王不悅謂無故置行省徒搖人心耳其後失昌榘撫三州王乃大悔曰從丞相之言當不至此頃之東京不守鑰墜馬傷足聞胡沙虎難作命駕將入省或告軍士守省府相幕皆不可入乃復還第胡沙虎意方猶豫不能自定亟從人望詣鑰問疾語以翼王章宗之兄顯宗長子衆望所屬元帥決策立之萬世之功也乃迎立宣宗卽位進拜左丞相封廣平郡王授中都路迭魯都世襲猛安蒲魯吉必刺謀克詔以足疾未愈侍朝無拜明年建議和親時奏事者請罷按察司鑰謂今郡縣多殘毀正須賴以撫集議罷遂止宣宗將幸南京勸以鑿幣一動北路皆不守况今已

氏姓譜

卷百四十九

七虞

徒單氏

三四

講和惟聚兵積粟固守京師策之上也南京四面受兵遼東根本之地依山負海其險足恃備禦一面以爲後圖策之次也不從是歲薨賻贈優厚爲人明敏方正學問該貫一時名士皆出其門冬至卿相嘗歎文士委頓雖巧拙不同要以仁義道德爲本乃著學之急道之要二篇太學諸生刻之于石有宏道集六卷

徒單克寧

本名智顯先由金源縣徙居比古土之地後置

猛安于山東遂占籍萊州父况者尙宗女官至汾陽軍節度使克寧資質渾厚寡言笑善騎射有勇畧通女直契丹字娶宗幹女嘉祥縣主母舅希尹薦于熙宗以充護衛由符寶祇候轉爲卽遷侍衛親軍馬步軍都指揮使因悼后弟裴滿忽土恃寵侮慢殿之后知其剛直不問改忠順軍節度使同母兄蒲甲判大宗正事海陵心忌之出爲西京

留守構致其罪誅之因降克寧知滕陽軍歷宿州防禦使
胡里改路節度使曷懶路兵馬都總管大定初詔以本路
兵會東京遷左翼都統討契丹窩斡襲賊輜重遇于長濼
謀衍使伏兵于左翼之側賊四百餘騎突出欲統陣後攻
我克寧與善射二十餘人拒之盡力奮擊賊乃却追奔十
餘里越九日復追及于露靈河二千騎追奔十五里殺傷
甚衆賊收軍返旆大兵尙未至令軍士下馬射賊遂引而
南時窩斡已再北世宗訝大軍久駐遣問謀衍歸咎騎弱
故少駐以完養馬力奏欲增益萬騎克寧奮言吾馬固不
少但帥不得其人常利鹵掠賊至則引避去則緩隨之故
賊恒得善牧我反捨其蹂踐之餘此吾馬所以弱也今誠
能更置良帥雖不益兵可以有功不然騎雖十倍未見其
利朝廷從之乃以僕散忠義兼都元帥將發賊聲言乞降

氏姓譜

卷百四十九

七虞

徒單氏

三五

克寧曰賊初困蹙且無降意是乃欲緩吾師期不若攻其
未備賊若挫劔其降必速如其不降且乘其怠而急擊之
可一戰而定也忠義然之與克寧俱出中路敗之于羅不
魯之地賊奔七渡河負險爲柵覘知柵背可上潛師夜登
俯射之大軍自下攻賊潰皆遁去事平除太原尹未闕月
宋吳璘侵陝徒單合喜乞益兵詔遣克寧參議軍事此人
智勇足敵萬人不必益軍乃佩金牌駐平涼下令安輯未
幾民皆完聚治兵伐宋帥府欲遣左都監璋以兵四千由
水路進詔皆付習顯出軍楚泗之間與宋將魏勝相距楚
州之十八里口勝取敵舟鑿其底貫以大木列植水中別
以船載巨石貫以鐵鑊沉之水底以塞其口克寧使斜耶
和尙選善游者沒水繫大繩植木上皆拔出之撤去沉船
進至淮口宋屯步兵四萬于南岸運河之間隔水來拒兵

石俱發捍以竹籬師遂入淮合戰數四猛安長壽先行薄岸敗其步兵克寧自引五騎先行六七里與戰札也銀木憑禦以步兵克寧自引五騎先行六七里與戰札也銀木可先登奮擊敗之宋大兵仍整陣來克寧麾兵前戰自旦至午宋兵敗餘衆數千走入營中射以火箭營舍盡焚復踰運河撤橋隔水射之宋兵不能爲陣猛安鈔兀不利少却亟引猛安賽刺九十騎橫擊之宋兵大敗追至楚州射殺魏勝遂取楚州及淮陰縣是役也賽刺功居多時宋屢遣使請和意向遷延及是始大懼一如期約兵罷改大名河間東平三尹召爲都點檢十一年從丞相志寧北伐還師皇太子生日置酒東宮賜以金帶明年遷樞密副使兼知大興府事改太子太保俄拜平章政事封密國公以女爲藩王永成妃得罪罷爲東京留守改南京故事未有兼

氏姓譜

卷百四十九

七虞

徒單氏

三六

統軍使者因上意使兼河而統軍使入京復平章政事授世襲不札土河猛安兼親管謀克宗族多在山東慈官田少無以盡給選其最親者徙之十九年拜右丞相徙封譚國公使徒單懷忠諭以宰相之職進賢爲上卿慎重得大臣體毋多讓今日親賓慶會可一飲過此勿飲克寧頓首謝二十一年轉左丞相徙封定國公未幾改樞密使進司卿必躬親之毋忽細微皇太子薨身護宮門嚴飭殿庭禁衛如法諸王妃主宗室外戚入臨從者皆有數語東官官屬汝等此時當以死報國吾亦不敢愛其生辭色俱厲聞者肅然召侍讀完顏匡爾侍太子日久金源郡王哀毀過甚爾當固諫身居冢嗣豈以哭泣常禮而忘宗社之重乎尤宜謹視勿去左右世宗遠聞嘉其忠誠愈重之還京表

請立皇太孫以係天下之望事貴果斷不可遲緩恐左右
讒邪或起覬覦萬一寡慎豈惟儲位久虛而骨肉之禍自
此始矣時世宗諸子趙王永中最長且與克寧有親因歎
以爲真社稷臣踰月詔起復皇孫原王爲右丞相拜克寧
太尉兼左丞相使輔導之上以中外皆患錢少京師積錢
祇五百萬貫欲除屯兵路分其他郡縣盡運其錢至京師
克寧奏曰若是民間錢益少矣不若起運其半以半變折
輕齋庶幾錢貨流布也上嘉納之十一月戊午入見于香
閣率幸臣屏左右又奏立太孫世宗許之因宴慶和殿語
諸王大臣太尉忠實明達漢周勃也稱歎再三明年正月
因思念鄉土求解機務詔許其往不必謝政四月遂還深
知國史事有未詳命以監修上頗措意仙佛初因盧溝河
決久不能塞加封安平侯水復故道以爲卽獲感應因奏

氏姓譜

卷百四十九

七虞

徒單氏

三七

神之所佑者正也報應之來皆由人事人事乖則弗享矣
無何宋主殂遣使進遺留物上怪其薄奏以此非常貢責
之近于奸利上皆是其言欲賜甲第固辭更賜錢宏其舊
居畢工臨幸賜金器錦繡重綵克寧亦有獻上飲懽甚親
解御衣服之畫其像藏于內府世宗不豫率宰執入問諭
以朕疾殆矣皇太孫生而明達卿等竭力輔之政務且可
權聽乙酉詔與皇太孫及諸王大臣俱宿禁中復奏宜別
嫌疑正名分宿止同處禮有未安詔乃易居慶和殿東廡
丙戌兼尙書令封延安郡王命宣遺詔立章宗徙封東平
郡王諭尙書省太傅年高每趨朝又赴省恐不易自今朔
望朝日設坐殿上固辭詔近臣勉諭涕泣以謝侍立益恭
詔文凡賊吏除名開落並量材錄用汝霖奏真盜枉法不
可恕克寧謂誤沾恩宥其害小國之大信不可失上深然

之頃之進拜太傅改封金源郡王賜金銀錢穀重祿并玉帶年高乞謝不許詔譯諸葛孔明傳以賜加勉調攝自旬休外四日仍居暇大事錄之細事不須親也上初卽位頗好辭章而疆場方有事尚書省奏猛安謀克願試進士者聽克寧謂承平日久今之猛安謀克其材武已不及前萬一有警使誰禦之習辭藝忘武備于國弗便上是其言明昌元年屬疾篤往視卽榻前拜太師封淄王加賜甚厚二年正月庚午薨遺表言不及私勸帝無重君子而內疎之輕小人而終昵之惟願慎終如始安不忘危詔有司護喪事歸葬萊州謚曰忠烈克寧功高而身愈下位盛而心愈勞可謂大臣矣五年配享世宗廟庭圖像衍慶宮大安元年改配享章宗廟庭

氏姓譜

卷百四十九

七虞

徒軍氏

三

照尙公主者凡四世祖撒合懋國初有功授隆安府路合扎謀克奪古阿鄰猛安釋美恣儀通諸國語尙熙宗第七女藩國公主充符寶祇候至爲郎遷御院通進歷宣德泰安淄州刺史有廉名改廣寧府同知以母鄂國公主憂不赴世宗特許制中襲其父封服闋授濟南府同知二十六年遷棣州防禦使以政績聞升臨海軍節度使卒

徒軍航一名張僧父號九駙馬至寧元年胡沙虎弑逆降航爲安州刺史會北兵大至城下聲言都城已失守汝可速降航謂其民曰城守雖嚴萬一攻破汝輩無子遺矣我家兩世駙馬受國厚恩決不可降汝輩計安出乃盡以家財犒軍民皆盡力備禦又五日航度城不可支乃先益其妻孥謂家人曰我死卽撤屋焚之遂自縊死城破軍民猶力戰曰太守旣死我輩不可獨降死者甚衆

徒單公弼本名習烈河北東路算主海猛安人父府君奴
尙熙宗女加駙馬都尉終武定軍節度使公弼初充奉御
大定二十七年尙世宗女息國公主加定遠大將軍駙馬
都尉改器物局直長轉副使兼近侍局直長父憂起復本
局副使章宗秋山射中虎因怒笑前侍衛皆避去公弼不
動虎亦隨斃詔責侍衛而慰諭公弼除濱州刺史再遷兵
部侍郎累除知大名府時因伐宋有司督逋租及牛頭稅
甚急奏言軍士從戎民亦疲弊可緩征以紓人困朝廷從
之大安初知大興府事諫武清盜疑其有寃已而果獲真
盜歲餘罪參知政事歷尙書左右丞至寧初拜平章政事
封定國公貞祐初進右丞相罷知中山府兵圍新解改知
河中府歷定國軍節度使皇太孫太師同判大陸親府事
興定五年薨宣宗輟朝贈諡恪愿

氏姓譜

卷百四十九

七虞

徒單氏

三元

徒單益都與粘合荆山時稱忠良之士益都累官延安總
管正大九年正月行省事于徐州到官纔三日徐邳義勝
軍總領侯進杜政張興率所部三千人出降州內兵甚少
乃籍州人及運糧婦兵得萬人乙巳元兵傅城燒南關而
去侯進時爲京東行省以千人來襲二月庚申未明坎南
城而上守者皆散走城中喧呼元兵已入南門益都聞之
不及甲率州署夜值兵三百由黃樓而南力戰禦敵亂定
遷賞有差自是軍勢稍振復奪敵所據張益渡取蕭縣破
白塔戰于土山救被俘老幼五千還徐旣而進亡命駐靈
壁政與興亦慮爲元所害窮窘自歸復撫而納之興留徐
政還邳州久之城本虛空政亦廢弛二子兩姪爲軍將頗
侵漁軍民所用青州人王祐爲埽兵總領將千七百人
有過管不責治故亦橫恣因與河間張祚下邑令李閏義勝

都統對仙遙授永州刺史成進忠輩謀以六月丁巳夜燒
草場作亂祐恐事不濟亟召張興與同事興推祐爲都元
帥復懼祐圖已并祚皆殺之因大掠城中益都先夜挈妻
子繞城而出壬戌國用安率兵至徐執興與其黨十餘人
伏誅遂以封仙爲元帥兼徐州節度使益都窘無所歸乃
奔宿州節度使紇石烈阿虎不納與諸將駐于城南宿有
鎮防軍逃還阿虎疑爲叛歸亦不納城中鎮防千戶高臘
哥結小吏郭仲安謀就徐州將士內外相應以取宿卽授
楊妙真甲戌夜半仲安開門綱徐軍總領王德全及妻弟
高元哥與東面總領劉安國入城縛阿虎父子殺之請益
都主帥府事時益都不從曰吾國家舊人爲將帥亦久今
大事已去方逃罪不暇豈有奪人城池以降外方乎卽日
率官吏行至穀熟東遇元兵不屈而死

氏姓譜

卷百四十九

七虞

徒單氏至

四

姑布氏

見史記趙簡子時姑布子卿善相初子卿見簡子簡子
徧召諸子相之子卿曰無爲將軍者簡子曰趙氏其滅
乎子卿曰吾嘗見一子于路殆君之子也簡子召子無
卹無卹至則子卿起曰此真將軍矣簡子曰此其母賤
翟婢也奚道貴哉子卿曰天所授雖賤必貴又漢有姑
布子望出東平

册將氏

見姓苑

歷代名賢

册將隆字君房東海蘭陵人也大司馬車騎將軍王音內
領尙書外典兵馬踵故選置從事中郎與參謀議奏議隆

爲從事中郎遷諫大夫成帝末隆奏封事言古者選諸侯入爲公卿以褒功德宜徵定陶王使在國邸以填萬方其後上竟立定陶王爲太子隆遷冀州牧潁川太守哀帝卽位以高第入爲京兆尹遷執金吾時侍中董賢方貴上使中黃門發武庫兵器天下公用國家武備繕治造作皆度大司農錢大司農錢自乘輿不以給共養共養勞賜壹出少府蓋不以本臧給末用不以民力共浮費別公私示正路也古者諸侯方伯得顓征伐乃賜斧鉞漢家邊吏職在距寇亦賜武庫兵皆任其事然後蒙之春秋之誼家不藏甲所以抑臣威損私力也今賢等便僻弄臣私恩微妾而以天下公用給其私門契國威器共其家備民力分于弄臣武兵設于微妾建立非宜以廣驕僭非所以示四方也孔子

氏姓譜

卷百四十九

七虞

毋將氏

四一

曰奚取于三家之堂臣請收還武庫上不說頃之傅太后使謁者買諸官婢賤取之復取執金吾官婢八人隆奏言賈賤請更平直于是制詔丞相御史大夫交讓之禮興則虞芮之訟息隆位九卿旣無以匡朝廷之不逮而反奏請與永信宮爭貴賤之賈程奏顯言衆莫不聞舉錯不由謹理爭求之各自此始無以示百僚傷化失俗以隆前有安國之言左遷爲沛郡都尉遷南郡太守王莽少時慕與隆交隆不甚附哀帝崩莽秉政使大司徒孔光奏隆前爲冀州牧治中山馮太后獄寃陷無辜不宜處位在中土木中謁者令史立侍御史丁元自典考之但與隆連名奏事史立時爲中太僕丁元泰山太守及尙書令趙昌譖鄭崇者爲河內太守皆免官徙合浦

毋將永蘭陵人從沛人高相受易官至豫章都尉

毋車氏

風俗通漢下邳相毋車伯奇望出樂安

毋終氏

左傳毋終子嘉父翟國君也

巫馬氏

明巫馬壽澤州人萬歷丙子舉人

歷代名賢

周

巫馬施字子旗魯人家語作巫馬期字子期陳人少孔子三十歲嘗與子路薪于韞邱之下陳之富人處師氏者指車百乘觴于韞邱之上子路曰使子無忘子之所知亦無進子之所能得此富終身無復見夫子子為之乎期喟然而歎曰聞之夫子志士不忘在溝壑勇士不忘喪其元子氏姓譜

卷百四十九

七虞

毋車氏至

四

不知子與試子與意者其志與子路心慙負薪先歸孔子曰由何為偕出而先返也子路以告孔子援琴而彈詩曰肅肅鶉羽集于苞栩王事靡盬不能藝稷黍父母何怙悠悠蒼天曷其有所予道不行邪使汝願者期幸單父以星出以星入日夜不處而單父溢期問于子賤曰子鳴琴而單父治一不見其勞何也子賤曰我任人子任力任人者佚任力者勞期曰是施之未至也

蒲成氏

蒲成南晉大夫

屠岸氏

屠岸賈屠岸夷俱晉大夫屠岸丕鄭使告重耳于翟

屠門氏

屠門少見容齋隨筆

朱泚氏

漢有朱泚漫

都尉氏

見漢儒林傳有都尉朝師事孔安國受尚書以授膠東

庸生

菟裘氏

史記秦嬴姓之後也其地魯邑今在兗州奉符

須句氏

子爵風姓太昊之後也鄆州壽張縣西北須胸城是其國子孫以國為氏或省句為須氏或省須為句氏又有須國姑姓又商有密須國其後亦為須氏今涇州靈臺是其國也

蒲姑氏

氏姓譜

卷百四十九

七虞

朱泚氏至

三

商諸侯居齊地

孤竹氏

商之諸侯也夷齊讓國其後遂以國為氏

狐邱氏

晉大夫狐邱林之後見世本英賢傳曰出自狐邱封人之裔

無鈞氏

芊姓潛夫論云楚蚡冒生邊章為王子無鈞氏焉

巫臣氏

芊姓楚屈蕩之子屈申也亦曰申公巫臣奔晉

無庸氏

芊姓姓氏英賢傳楚熊渠生無庸又無庸先生學仙道

無婁氏

嬴姓苕公子無婁之後又無婁先生著書今瓊邪有此姓

須遂氏

遂圖有須遂氏

烏裕氏

伯益佐堯有養烏獸之功賜氏烏裕

巫咸氏

商卿也其後氏焉

屠住氏

芊姓英賢傳楚公子屠食采于住鄉因氏焉

蒲圃氏

魯人以所居為氏

邾婁氏

氏姓譜

卷百四十九

七虞

須遂氏至

四

兪豆苑

芊姓楚公子食采于兪豆因氏焉

上平聲

八齊

齊季氏

姜姓齊襄公子季奔楚因氏焉世本齊季窺魯大夫

提彌氏

見左傳

歷代名賢

周

提彌明為趙盾車右公飲盾酒伏甲將攻之明知之趨登曰臣侍君寡過三爵非禮也遂扶以下公喉夫癸焉明搦而殺之盾曰棄人用犬雖猛何為閻且出明死之

西陵氏

古侯國也黃帝元妃西陵氏女名嫫祖春秋時有大夫

西陵高

西門氏

鄭大夫居西門因氏焉望出晉陽西門子見列子漢西門息王莽時入西門惠見神仙傳卜光武當為天子唐西門君中尉宋西門洽祥符登科西門解濱州人大觀登科明西門炳日照人永樂中河南洧州縣丞

歷代名賢

同

西門豹魏文侯時為鄴令豹往到鄴會長老問民所疾苦長老曰苦為河伯娶婦以故貧豹問其故對曰鄴三老廷掾常歲賦歛百姓收取其錢得數百萬用其二三十萬為

氏姓譜

卷百四十九

八齊

齊季氏至 西門氏 四

河伯娶婦與祝巫共分其餘錢持歸當其時巫行視小家女好者云是當為河伯婦即聘取洗沐之為治新繪綺縠衣間居齋戒為治齊宮河上張緹絳帷女居其中為具牛酒飯食行十餘日共粉飾之如嫁女床席令女居其上浮之河中始浮行數十里乃没其人家有好女者恐大巫祝為河伯取之以故多持女遠逃亡以故城中益空無人及困貧所從來久遠矣民人俗語曰即不為河伯娶婦水來漂沒溺其人民云西門豹曰至為河伯娶婦時願三老巫祝父老送女河上幸來告語之吾亦往送女皆曰諾至其時西門豹往會之河上三老官屬豪長者里父老皆會以人民往觀之者三二千人其巫老女子也已年七十從弟子女十人所皆衣繪單衣立大巫後西門豹曰呼河伯婦來視其好醜即將女出帷中來至前豹視之顧謂三老巫

祝父老曰是女子不好煩大巫媪爲入報河伯得更求妍
女後日送之卽使吏卒共抱大巫媪投之河中有頃曰巫
媪何久也弟子趣之復以弟子一人投河中有頃曰弟子
何久也復使一人趣之復投一弟子河中凡投三弟子西
門豹曰巫媪弟子是女子也不能白事煩三老爲人白之
復投三老河中西門豹簪筆磬折嚮河立待良久長老吏
傍觀者皆驚恐西門豹顧曰巫媪三老不來還奈之何欲
復使廷掾與豪長者一人入趣之皆叩頭叩頭且破額血
流地色如死灰西門豹曰諾且留待之須臾須臾豹曰廷
掾起矣狀河伯留客之久若能罷去歸矣鄴吏民大驚恐
從是以後不敢復言爲河伯娶婦西門豹卽發民鑿十二
渠引河水灌民田田皆溉當其時民治渠少煩苦不欲也
豹曰民可以樂成不可與慮始今父老子弟雖患苦我然

氏姓譜

卷百四十九

八齊

西門氏至

四

百歲後期令父老子孫思我言至今皆得水利民人以給
足富十二渠經絕馳道到漢之立而長吏以爲十二渠橋
絕馳道相比近不可欲合渠水且至馳道合三渠爲一橋
鄴民人父老不肯聽長吏以爲西門君所爲也賢君之法
式不可更也長吏終聽置之故西門豹爲鄴令名聞天下
澤流後世無絕已時幾可謂非賢大夫哉

西郭氏

英賢傳云齊有賢者居西郭因氏焉西郭嵩漢謁者僕
射晉西郭湯北海人爲秘書郎何承天云西朝名士也

西方氏

姓苑云少昊金天氏位主西方金因氏焉宋西方瓌瀟

州人登科

歷代名賢

西方鄴定州滿城人也父再遇為汴州軍校鄴居軍中以
 勇力聞年二十南渡河遊梁不見用復歸莊宗於河上莊
 宗以為孝義指揮使數從征伐有功同光中為曹州刺史
 以州兵屯汴州明宗自魏反兵南渡河而莊宗東幸汴州
 汴州節度使孔循懷二志使北門迎明宗西門迎莊宗所
 以供帳委積如一曰先至者入之鄴因責循曰主上破梁
 而得公有不殺之恩奈何欲納總管而負國循不答鄴度
 循不可爭而石敬瑭妻明宗女也時方在汴鄴欲殺之以
 堅人心循知其謀取之藏其家鄴無如之何而明宗已及
 汴乃將麾下兵五百騎西迎莊宗於汜水鳴咽泣下莊宗
 亦為之嗟唏乃使以兵為先鋒莊宗至汴西不得入還洛
 陽遇弒明宗入洛鄴請死于馬前明宗嘉歎久之明年荆
 氏姓譜

卷百四十九

八齊

西方氏

四

南高季興叛明宗遣襄州節度使劉訓等招討而以東川
 董璋為西南面招討使乃拜鄴夔州刺史副璋以兵出三
 峽已而訓等無功見黜諸將皆罷璋亦未嘗出兵惟鄴獨
 取三州乃以夔州為寧江軍拜鄴節度使已而又取歸州
 數敗季興之兵鄴武人所為多不中法度判官譚善達數
 以諫鄴怒遣人告善達受人金下獄善達索剛辭益不遜
 遂死於獄中鄴病見善達為崇卒於鎮

西鄉氏

曹

風俗通宋大夫西鄉錯之後見世本尸子有隱者西鄉

西鉏氏

左傳宋大夫西鉏吾漢侍御史西鉏虛見英賢傳

歷代名賢

周 西鉏吾為太宰事宋平公平公三年楚納魚石彭城我患之西鉏吾曰何也若楚人與吾同惡以德於我吾固事之也不敢貳矣大國無厭鄙我猶恨不然而收吾憎使贊其政以間吾釁亦吾患也今將崇諸侯之姦而披其地以塞夷庚逞姦而攜服毒諸侯而懼吳晉吾庸多矣非吾憂也且事晉何為晉必恤之十二年宋災樂喜為政使西鉏吾庀府守令司宮巷伯傲宮

奚容氏

史記奚容蒧字子哲衛人家語作奚蒧字子借孔子弟

子

西乞氏

出自姬姓周太王五世孫虞仲封於虞為晉所滅虞之

氏姓譜

卷百四十九

八齊

西鄉氏至

哭

公族井伯奚勝伯姬於秦受邑於百里因號百里奚奚生視視二子一曰西乞術其後以為氏

歷代名賢

周

西乞術初事秦穆公公薨復事康公康公六年公使術如魯聘且言將伐晉魯公子遂辭玉曰君不忘先君之好臨魯國鎮撫其社稷重之以大器寡君敢辭玉對曰不腆敝器不足辭也三辭術答曰寡君願徼福於周公魯公以事君不腆先君之敝器使下臣致諸執事以為瑞節要締好命所以藉寡君之命結二國之好是以敢致之魯厚瞻之

西周氏

赧王為西周武公其後為西周氏

西王氏

新序子夏曰禹學于西王國

西申氏

瑞應圖周成王時西申國獻鳳留中國因氏焉

西宮氏

西野氏

俱見姓苑

西都氏

見王符潛夫論

西閭氏

說苑有西閭過

上平聲

淮夷氏

氏姓譜

卷百四十九

八

西王氏至

兕

姓纂云淮夷小國入周因氏焉其地今淮甸

上平聲

十一

真郭氏

唐總管真郭待封同薛仁貴擊吐蕃

淳于氏

亦曰州公姜姓風俗通曰春秋時之小國也桓五年不復其國子孫以國為氏唐元和初避憲宗嫌名改為于氏其地本在密州高密為杞所并遷江南杜預云南郡華容縣是也華容今荆南府監利縣

歷代名賢

同

淳于髡齊之贅婿也長不滿七尺滑稽多辯數使諸侯未嘗屈辱齊威王之時喜隱好為淫樂長夜之飲沉湎不溢

委政卿大夫百官荒亂諸侯並侵國且危亡在於旦暮左右莫敢諫髡說之以隱曰國中有大鳥止王之庭三年不蜚又不鳴王知此鳥何也王曰此鳥不飛則已一飛冲天不鳴則已一鳴驚人於是乃朝諸縣令長七十二人賞一人誅一人奮兵而出諸侯振驚皆還齊侵地威行三十六年威王八年楚大發兵加齊齊王使淳于髡之趙請救兵齎金百斤車馬十駟淳于髡仰天大笑冠纓索絕王曰先生少之乎髡曰何敢王曰笑豈有說乎髡曰今者臣從東方來見道傍有饉田者操一豚蹄酒一孟祝曰甌窶滿篝汙邪滿車五穀蕃熟穰穰滿家臣見其所持者狹而所欲者奢故笑之於是齊威王乃益齎黃金千鎰白璧十雙車馬百駟髡辭而行至趙趙王與之精兵十萬草車千乘楚聞之夜引兵去威王大悅置酒後宮召髡賜之酒問曰先

氏姓譜

卷百四十九

十一頁 淳于氏

五

生能飲幾何而醉髡對曰臣飲一斗亦醉一石亦醉威王曰先生飲一斗而醉惡能飲一石哉其說可得聞乎髡曰賜酒大王之前執法在傍御史在後髡恐懼俯伏而飲不過一斗徑醉矣若親有嚴客髡鞞鞫騰侍酒於前時賜餘瀝奉觴上壽數起飲不過二斗徑醉矣若朋友交游久不相見卒然相覩歡然道故私情相語飲可五六斗徑醉矣若乃州閭之會男女雜坐行酒稽留六博投壺相引爲曹握手無罰目眊不禁前有墮珥後有遺簪髡竊樂此飲可八斗而醉二參日暮酒闌合尊促坐男女同席履舄交錯杯盤狼籍堂上燭滅主人留髡而送客羅襦襟解微聞薌澤當此之時髡心最歡能飲一石故曰酒極則亂樂極則悲萬事盡然言不可極極之而衰以諷諫焉齊王曰善乃罷長夜之飲以髡爲諸侯主客宗室置酒髡嘗在側

淳于意臨菑人也齊太倉長少而喜醫方術高后八年更受師同郡元里公乘陽慶年七十餘無子使意盡去其故方更悉以禁方予之傳黃帝扁鵲之脈書五色診病知人死生決嫌疑定可治及藥論甚精受之三年為人治病決死生多驗然左右行游諸侯不以家為家或不為人治病家多怨之者文帝四年中人上書言意以刑罪當傳西之長安意有五女隨而泣意怒罵曰生子不生男緩急無可使者於是少女緹縈傷父之言乃隨父西上書上悲其意此歲中亦除肉刑法意家居詔名問所為治病死生驗者幾何人主名為誰詔聞故太倉長臣意方伎所長及所治病者有其書無有皆安受學受學幾何歲嘗有所驗何縣里人也何病醫藥已其病之狀皆何如意具悉以對

氏姓譜

卷百四十九

十一頁

淳于氏

五一

淳于越黃縣人髡之後仕為博士以諫知名見史記

淳于恭字孟孫北海淳于人也善說老子清靜不慕榮名

家有山田果樹人或侵盜輒助為收採又見偷刈禾者恭

念其愧因伏草中盜去乃起里落花之王莽末歲飢兵起

恭兄崇將為盜所烹恭請代得與俱免後崇卒恭養孤幼

教諭學問有不如法輒反用杖自箠以感悟之兒慙而改

過初遭賊寇百姓莫事農桑恭常獨力田耕鄉人止之曰

時方淆亂死生未分何空自苦為恭曰縱我不得它人何

傷墾耨不輟後州郡連召不應遂幽居養志潛於山澤舉

動周旋必由禮度建武中郡舉孝廉司空辟皆不應客隱

琅邪黔陬山遂數十年建初元年肅宗下詔美恭素行告

郡賜帛二十四匹遣詣公車除為議郎引見極日訪以政事

遷侍中驢都尉禮待甚優其所薦名賢無不徵用進對陳

政皆本道德帝與之言未嘗不稱善五年病篤使者數存問卒於官詔書褒歎賜穀千斛刻石表閭除子孝爲太子舍人

晉

淳于智字叔平濟北盧人也有思義能易筮善厭勝之術高平劉柔夜臥鼠齒其左手中指以問智智曰是欲殺君而不能當爲君使其反死乃以朱書手腕橫文後三寸作田字辟方一寸二分使露手以臥明旦有大鼠伏死於手前譙人夏侯藻母病困詣智卜忽有一狐當門向之嗥藻怖愕馳見智智曰其禍甚急君速歸在狐嗥處拊心啼哭令家人驚怪大小必出一人勿出哭勿止然後其禍可救也藻還如其言母亦扶病而出家人旣集堂屋五間拉然而崩護軍張劭母病篤智筮之使西出市沐猴繫母臂令

氏姓譜

卷百四十九

士頁 淳于氏

五

傍人拋拍恒使作聲三日放去劬從之其猴出門卽爲犬所咋死母病遂差上黨鮑瑗家多喪病貧苦或謂之曰淳于叔平神人也君何不試就卜知禍所在瑗性質直不信卜筮曰人生有命豈卜筮所移會智來應詹謂曰此君寒士每多屯虞君有通靈之思可爲一卦智乃爲卦卦成謂瑗曰君安宅失宜故令君困君舍東北有大桑樹君徑至市入門數十步當有一人持荆馬鞭者便就買以懸此樹三年當暴得財瑗承言詣市果得馬鞭懸之三年浚井得錢數十萬銅鐵器復二十餘萬於是致瞻疾者亦愈其消災轉禍不可勝絕而卜筮所占千百皆中應詹少亦多病智乃爲符使詹佩之誦其文旣而皆驗莫能學也性深沈常自言短命曰辛亥歲天下有事當有巫醫拔道術者死吾守易義以行之猶當不應此乎太元末爲司馬督有寵

於楊駿故見殺

南史

淳于誕字靈遠其先太山中人也後世居蜀漢或家安國之桓陵縣父興宗齊南安太守誕年十二隨父向揚州父於路爲羣盜所害誕雖幼而哀感奮發傾資結客旬朔之內遂得復讎州里之間無不稱歎景明中自漢歸魏陳伐蜀計宣武嘉納之延昌末王旅大舉除驃騎將軍都督別部司馬領鄉導統軍誕不願先受榮爵乃固讓實官止參戎號及奉辭之日詔若剋成都卽以益州許之師次晉壽蜀人大震屬宣武宴駕不果而還後以客例起家羽林監正光中秦隴反叛詔誕爲西南道軍司馬與行臺魏子建共參經畧時梁益州刺史蕭深猷遣將樊文熾蕭世澄等率衆數萬圍小劔成子建遣誕勒兵馳赴大敗之擒世澄

氏姓譜

卷百四十九

士真

淳于氏

五三

等十一人文熾先走獲免孝昌初子建以誕行華陽郡帶白馬戎後卒於東梁州刺史贈益州刺史諡曰莊

淳于暈字思明建業人偉姿容有幹畧便弓馬事梁元帝以軍功封廣晉縣男出爲都督桂州刺史

唐

淳于難髡之後隋末兵亂與弟朗帥衆保障登萊民賴以安武德中拜登州刺史封晉國公朗萊州刺史封燕國公淳于雍髡之後也仕爲太子中舍人年甫強仕卽乞歸養王贈以詩有云純孝救時俗高風自古人

歷代列女

淳于氏女漢太倉令淳于意之少女也名緹縈意無男有女五人孝文皇帝時意有罪當刑是時肉刑尙在詔獄縈長安當行會逮意罵其女曰生子不生男緩急非有益纒

縈自悲泣而隨其父至長安上書曰妾父爲吏齊中皆稱廉平今坐法當刑妾傷夫死者不可復生刑者不可復續雖欲改過自新其道無由也妾願入身爲官婢以贖父罪使得自新書奏天子憐悲其意乃下詔曰蓋聞有虞之時畫衣冠異章服以爲戮而民不犯何其至治也今法有肉刑五而姦不止其咎安在非朕德薄而教之不明歟吾甚自媿夫訓道不純而愚民陷焉詩云愷悌君子民之父母今人有過教未施而刑已加焉或欲改行爲善而其道無由朕甚憐之夫刑者至斷支體刻肌膚終身不息何其痛而不德也豈稱爲民父母之意哉其除肉刑自是之後鑿顛者髡抽脅者笞別足者鉗意遂得免焉君子謂緹縈一言發聖主之意可謂得事之宜矣詩云辭之懌矣民之莫矣此之謂也

氏姓譜

卷百四十九

十一頁

申徒氏至

五

新垣氏

風俗通魏將新垣衍畢公高之後

歷代名賢

新垣衍魏王使說趙共尊秦爲帝魯仲連辭却之

賈

新垣平漢文帝時有人持玉盃上書闕下獻平乃言曰闕下有寶玉氣來者已而果有人獻玉盃

辛蓼氏

楚大夫辛蓼之後漢有河間相辛蓼通

申徒氏

風俗通云本申屠氏隨音改爲申徒氏申徒狄夏賢人湯以天下授之恥不以義聞已自殺于河申徒兀鄭人

見莊子漢申徒建西屏將軍申徒朗河內人尚書郎

申章氏

漢申章昌字曼君楚人從梁人丁姓受穀梁春秋為博士官至長沙王太傅

申鮮氏

漢申鮮洳中謁堵

歷代名賢

周

申鮮虞齊莊公近臣崔杼弑莊公問邱嬰以帷縛其妻而載之與申鮮虞乘而出申鮮虞推而下之曰君昏不能匡危不能救死不能死而知匿其暱其誰納之行及弇中將舍嬰曰崔慶其追我申鮮虞曰一與一誰能懼我遂舍枕轡而寢食馬而食駕而行出弇中謂嬰曰速驅之崔慶之

氏姓譜

卷百四十九

十二頁

申章氏五

五

衆不可當也遂奔魯僕賃于野以喪莊公楚人召申鮮虞虞如楚為右尹子傅摯亦事莊公以武力聞

申屠氏

姜姓周幽王申后兄申侯之後支子居安定屠原因以為氏一說申徒狄夏賢人後音轉改為申屠氏又有作勝屠者或云申屠楚官號明申屠衡字仲權長洲人洪武初授翰林院修撰申屠祺崇德人洪武中任御史申屠建懷安人永樂舉人任湘潭縣教諭申屠迪懷安人天順間任訓導

歷代名賢

漢

申屠嘉梁人也以材官蹶張從高帝擊項籍遷為隊率從擊黥布為都尉孝惠時為淮陽守孝文元年舉故以二千

石從高祖者悉以爲闕內侯食邑二十四人而嘉食邑五百戶十六年遷爲御史大夫張蒼免相文帝以皇后弟竇廣國賢有行欲相之曰恐天下以吾私廣國久念不可而高帝時大臣餘見無可者乃以御史大夫嘉爲丞相因故邑封爲故安侯嘉爲人廉直門不受私謁是時太中大夫鄧通方愛幸賞賜累鉅萬文帝常燕飲通家其見寵如是是時嘉入朝而通居上旁有怠慢之禮嘉奏事畢因言曰陛下幸愛羣臣則富貴之至於朝廷之禮不可以不肅上曰君勿言吾私之罷朝坐府中嘉爲檄召通詣丞相府不來且斬通通恐入言上上曰汝弟往吾今使人召若通至詣丞相府免冠徒跣頓首謝嘉嘉坐自如弗爲禮責曰夫朝廷者高皇帝之朝廷也通小臣戲殿上大不敬當斬史今行斬之通頓首首盡出血不解上度丞相已困通使使

氏姓譜

卷百四十九

上真

申屠氏

五

持節召通而謝丞相此吾弄臣君釋之鄧通既至爲上泣曰丞相幾殺臣嘉爲丞相五歲文帝崩孝景卽位二年晁錯爲內史貴幸用事諸法令多所請變更議以適罰侵削諸侯而丞相嘉自絀所言不用疾錯錯爲內史門東出不便更穿一門南出南出者太上皇廟墀垣也嘉聞錯穿宗廟垣爲奏請誅錯錯有語錯錯恐夜入官上謁自歸上至朝嘉請誅晁錯上曰錯所穿非真廟垣乃外墀垣故死官居其中且又我使爲之錯無罪罷朝嘉謂長史曰吾悔不先斬錯乃請之爲錯所賣至咎囚嘔血而死諡曰節侯傳子至孫夷有罪國除

申屠蟠字子龍陳留外黃人也九歲喪父哀毀過禮服除不進酒肉十餘年每忌日輒三日不食同郡緱氏女玉父報仇殺夫氏之黨吏執玉以告外黃令梁配配欲論

王蟠時年十五爲諸生進諫曰王之節義足以感無恥之
孫激忍辱之子不遭明時尙當表旌廬墓况在清聽而不
加哀矜配善其言乃爲讞得減死論鄉人稱美之家貧傭
爲漆工郭林宗見而奇之同郡蔡邕深重蟠及被州辟乃
辭讓之曰申屠蟠稟氣元妙性敏心通喪親盡禮幾於毀
滅至行美義人所鮮能安貧樂潛味道守真不爲燥濕輕
重不爲窮達易節方之於邕以齒則長以德則賢後郡召
爲主簿不行遂隱居精學博貫五經兼明圖緯始與濟陰
王子居同在太學子居臨沒以身託蟠蟠乃躬推輦車送
喪歸於鄉里遇司隸從事於河壘之間從事義之爲封傳
護送蟠不肯受投傳於地而去事畢還學太尉黃瓊辟不
就及瓊卒塋江夏四方名豪會帳下者六七千人互相談
論莫有及蟠者惟南郡一坐與相酬對旣別執蟠手曰君

氏姓譜

卷百四十九

十一真 申屠氏

七

非聘則徵如是相見於上京矣蟠勃然作色曰始吾以子
爲可與言也何意乃相拘教樂貴之徒邪因振手而去不
復與言再舉有道不就先是京師游士汝南范滂等非許
朝政自公卿以下皆折節下之太學生爭慕其風以爲文
學將興處士復用蟠獨歎曰昔戰國之世處士橫議列國
之王至爲擁篲先驅卒有坑儒燒書之禍今之謂矣乃絕
迹於梁碭之間因樹爲屋自同傭人居二年滂等果羅黨
錮或死或刑者數百人蟠確然免於疑論後蟠友人陳郡
馮雍坐事繫獄豫州牧黃琬欲殺之或勸蟠救雍蟠不肯
行曰黃子琬爲吾故邪未必合罪如不用吾言雖往何益
琬聞之遂免雍罪大將軍何進連徵不詣進必欲致之使
蟠同郡黃忠爲書勸之蟠不答中平五年復爲荀爽鄭元
及潁川韓融陳紀等十四人並博士徵不至明年董卓廢

立蟠及爽融紀等復俱公車徵惟蟠不到衆人咸勸之蟠笑而不應居無幾爽等爲卓所脅迫西都長安京師擾亂及大駕西遷公卿多遇兵飢室家流散融等僅以身脫惟蟠處亂末終全高志年七十四終於家

申屠剛字巨卿嘉七世孫也質性方直嘗募史鮑汲黯之爲人仕郡功曹平帝時王莽專政朝多猜忌遂隔絕帝外家馮衛二族不得交官剛常疾之及舉賢良方正因對策極陳時政書奏莽令元后下詔曰剛所言僻經妄說違背大義其罷歸田里後莽篡位剛遂避地河西轉入巴蜀往來二十許年及隗囂據隴右欲背漢而附公孫述剛說之囂不納遂畔從述建武七年詔書徵剛剛將歸又與囂書囂終不納剛到畔侍御史遷尙書令光武嘗欲出游剛以隴蜀未平不宜宴安逸豫諫不見聽遂以頭朝乘輿輪帝

氏姓譜

卷百四十九

十一頁

申屠氏

五八

遂爲止時內外羣官多帝自選舉加以法理嚴察職事過苦尙書近臣至乃捶撲牽曳於前羣臣莫敢正言剛每輒極諫又數言皇太子宜時就東宮簡任賢保以成其德帝並不納以數切諫失旨數年出爲平陰令復徵拜太中大夫以疾去官卒於家

元

申屠致遠字大用東平壽張人世祖南征駐兵小濮荆湖經畧使薦爲本司知事軍中機務多所參畫至元初崔斌守東平聘爲儒學官尋授太祝兼奉禮郎帝遣太常卿問毛血之薦致遠對曰毛以告純血以告新禮也宋平兩浙宣慰使舉爲都事首言宋圖籍宜上之朝廷江南學田當仍留以贍學行省從之遷杭州總管府推官宋駙馬楊鑑子玠節家富於貲守藏吏姚溶竊其銀懼事覺誣玠節監

與宋廣益二王通有司榜笞誣服獄具致遠讞之得其情
溶始伏辜西僧楊璉真伽作淨屠於宋故宮欲取高宗所
書九經石刻以築基致遠力拒之乃止二十年拜南臺御
史江准行省副使郗顯李兼懃平章忙古反不法詔勿問
仍以顯等付平章鞫必抵于死致遠慮囚浙西知其寃將
縱之忙古反脅以勢不爲動親脫顯等械使從軍自贖桑
哥當國治書侍御史陳天祥奉使湖廣劾平章要束木貪
狀桑哥誣以不道奏遣使逮訊行臺御史憚其威莫敢往
致遠慨然請行比至累章極辨其誣桑哥方促定天祥罪
會致遠章上氣乃沮江西平章馬合謀於商稅外橫加征
取忽辛籍鄉民爲匠戶轉運使盧世榮權茶牟利致遠并
劾之又言占城日本不可涉海遠征徒耗中國銓選限以
南北優苦不均他如罷香莎米弛竹課禁設司獄醫學等

氏姓譜

卷百四十九

十一頁

申屠氏至

五

員皆其所條議行者成宗大德初出僉江北大道事行部至
和州卒所著忍齋行稿四十卷釋奠通禮三卷杜詩纂例
十卷嘗積書萬餘冊名曰墨莊

申屠黈字敬仲諸暨人謹言端行爲鄉里所重性寡合望
之容色毅然至有所請則溫煦和婉辨析必盡工古文辭
春容簡奧精篆籀小楷咄咄秦晉辟本路教授辭不行晚
節益堅有遺世獨立之意所著有孝全撫言數卷

申屠有涯放曠林泉嘗攜一瓶一日忽躍入瓶中時號瓶

隱

申公氏

周申公巫臣又名屈巫楚公族也公伐蕭師多寒巫臣
勸公拊而循之三軍之士皆如挾纊又申公壽餘楚臣

申叔氏

通志云楚大夫申叔侯食邑于申此申叔時之後也
歷代名賢

周

申叔時爲楚大夫事莊王莊王十六年王入陳殺夏徵舒遂縣陳申叔時使於齊反復命而退王使讓之曰夏徵舒爲不道弑其君寡人以諸侯討而戮之諸侯縣公皆慶寡人汝獨不慶寡人何故對曰猶可辭乎王曰可哉曰夏徵舒弑其君其罪大矣討而戮之君之義也抑人亦有言曰牽牛以蹊人之田而奪之牛牽牛以蹊者信有罪矣而奪之牛罰已重矣諸侯之從也曰討有罪也今縣陳貪其富也以討召諸侯而以貪歸之無乃不可乎王曰善哉吾未之聞也反之可乎曰可哉吾儕小人所謂取諸其懷而與之也乃復封陳十九年我使申無畏聘于齊宋殺之我圍

氏姓譜

卷百四十九

十一頁

申叔氏

六

宋凡九月將去宋時僕曰築室反耕者宋必聽命從之宋懼及我平王使士亹傅太子審辭曰臣不材無能益焉王曰賴子之善善之也對曰夫善在太子太子欲善善人將至若不欲善善則不用故堯有丹朱舜有商均啟有五觀湯有太甲文王有管蔡是五王者皆元德也而有姦子夫豈不欲其善不能故也若民煩可教訓蠻夷戎狄其不賓也久矣中國所不能用也王卒使傅之問於時時曰教之春秋而爲之聳善而抑惡焉以戒勸其心教之書而爲之昭明德而廢幽昏焉以休懼其動教之詩而爲之道廣顯德以耀明其志教之禮使知上下之則教之樂以疏其穢而鎮其浮教之令使訪物官教之語使明其德而知先王之務用明德於民也教之故志使知廢興者而戒懼焉教之訓典使知族類行比義焉若是而不從動而不悛則文

詠物以行之求賢良以翼之峻而不攝則身勤之多訓典刑以納之務慎惇篤以固之攝而不徹則明施舍以道之忠明久長以道之信明度量以道之義明等級以道之禮明恭儉以道之孝明敬戒以道之事明慈愛以道之仁明昭利以道之文明除害以道之武明精意以道之罰明正德以道之賞明齊肅以耀之臨若是而不濟不可爲也且夫諱詩以輔相之威儀以先後之體貌以左右之明行以宣翼之制節義以動行之恭敬以臨監之勤勉以勸之孝順以納之忠信以發之德音以揚之教備而不從者非人也其可興乎夫子踐位則退自退則敬不則振莊王薨事共王共王及晉平既盟于宋十五年將侵鄭衛公子貞曰新興晉盟而背之無乃不可乎公子側曰敵利則進向盟之有時老矣在申聞之曰子反必不免信以守禮禮以庇

氏姓譜

卷百四十九

十一頁 申叔氏

六一

身信禮之亡欲免得乎十六年晉伐鄭我救之公子側將中軍過申入見時曰師其何如對曰德刑詳義禮信戰之器也德以施惠刑以正邪詳以事神義以建利禮以順時信以守物民生厚而德正則利而事節時順而物成上下和睦周旋不逆求無不具各知其極故詩曰立我烝民莫匪爾極是以神降之福時無災害民生敦龐和同以聽莫不盡力以從上命致死以補其闕此戰之所由克也今楚內棄其民而外絕其好攬齊盟而食話言奸時以動而疲民以逞民不知信進退罪也人恤所底其誰致死子其勉之吾不復見子矣戰於鄢陵我師敗績遂殺公子側時子曰跪共王之卽位也將伐魯使屈巫聘於齊且告師期屈巫盡室以行跪從其父將適郢遇之曰異哉夫子有三軍之懼而又有桑中之喜宜將竊妻以逃者也屈巫果不反

而以夏姬奔晉

申叔隲時之孫也康王八年使遠于馮爲令尹子馮訪於
豫豫曰國多寵而王弱國不可爲也子馮以疾辭乃使公
子追舒爲令尹觀起有寵於追舒未益祿而有馬數十乘
明年王殺追舒轅觀起復使遠于馮爲令尹有寵於子馮
者八人皆無祿而多馬他日朝與豫言弗應而退從之入
於人中又從之遂歸退朝見之曰子三困我於朝吾懼不
敢不見吾過子姑告我何疾我也對曰吾不免是懼何敢
告子曰何故對曰昔觀起有寵於子南子南得罪觀起車
裂何故不懼子馮自御而歸不能當道至謂八人者曰吾
見申叔夫子所謂生死而月骨也知我者如夫子則可不
然請止辭八人者而後王安之

申叔展楚大夫事莊王與蕭大夫還無社善莊王十七年

曰姓譜

卷百四十九

十一頁

申叔氏

六一

我伐蕭蕭潰遂傳於蕭還無社與司馬卯言號展展曰有
麥麴乎曰無有山鞠窮乎曰無河魚腹疾奈何曰目於蟹
井而拯之若爲茅經哭井則已明日蕭潰展視其井則茅
經存焉號而出之司馬卯亦楚大夫

氏姓譜卷百四十九終

湘鄉 蕭智漢雲澤氏纂輯

男秉信明甫氏校

上平聲 十二支

聞人氏

風俗通少正卯魯之聞人其後遂以為氏然聞達之人皆謂聞人何必少正卯以惡聞也漢聞人襲字定卿沛國人官太僕歷為太尉隋聞人嗣安蘇州總管五代聞人凝周龍德三年富川令

歷代名賢

漢

聞人通漢字子方沛人事東海后倉倉說禮數萬言號曰后氏曲臺記通漢盡得其傳以太子舍人論石渠至中山

氏姓譜

卷百五十

十二支 聞人氏

中尉

南北

聞人夔吳興人年十七結客報父仇為齊高帝所賞位至長水校尉

宋

聞人宏頌字君度嘉興人也朝散大夫安遠之子挺特不羣弱寇遊大學有名第進士授通判司法陳瓊貶台州宏頌從遊乞改天台兵曹人高其誼後知宣城有善政卒判常州所著文集及中興要覽周官通解經史旁闡藏于家葬今嘉善縣遷南區

聞人操字君儀刻意為學遂以詩學擅名登熙寧三年甲科剛敏練達不畏強禦清白之操人師式之卒年九十

元

聞人夢吉字應之金華人父詵老嘗遊王栢之門夢吉授
學家庭父子自相師友手抄七經傳疏深究義理閉戶逾
十年悉通奧旨乃開門講學秦定間貢授泉州教諭平生
信道篤涵養益純識與不識莫不稱爲有道君子門人謚
曰凝熙先生

明

聞人瑄餘姚人成化間知寧國縣治邑如家尤勤撫字擢

兵部郎中

歷代列女

聞人氏俞新妻夫死不嫁事姑孝姑病風失明氏手滌溷
穢時時舐其目目爲復明

上平聲

十三元

軒邱氏

氏姓譜

卷百五十

十三元

軒邱氏至

二

莘姓楚文王庶子食采軒邱因氏漢軒邱豹梁相

軒轅氏

亦爲帝鴻氏宋軒轅損祚符登科軒轅範咸平間知興

化軍事

歷代名賢

唐

軒轅集博羅人隱居羅浮山年百餘歲宣宗名問長生之
術集對曰衛聲色去滋味哀樂不過德刑無偏自然與天
地合德日月齊明故堯舜禹湯之所以登上壽者用此道
也

孫陽氏

嬴姓英賢傳曰秦穆公子有孫陽伯樂善相馬漢有侍

御史孫陽放

原仲氏

陳大夫原仲之後原仲茂楚悼王時人

門尹氏

宋門尹般之後門尹沮渠宋人門尹班宋大夫楚伐宋

宋使班告急于晉

盆成氏

晏子春秋孔子門人有盆成适孫奭曰嘗欲學于孟子
誤按孟子時盆成括想別有一人孫奭所注蓋指彼耳

歷代名賢

同

盆成适孔子門人齊景公宿于路寢之宮夜分聞西方有
男子哭者公悲之明日朝問于晏子晏子對曰西郭徙居
布衣之士盆成适也父之孝子兄之順弟也今其母不幸

氏姓譜

卷百五十

十三元

原仲氏至

三

溫作氏

而死耐極未葬家貧身老子稱恐力不能合耐是以悲也
公曰子爲寡人弔之嬰往弔咎公不辱臨公使男子祖免
女子髮箒開凶門而迎适

尊盧氏

古太昊時諸侯

根水氏

世本老童娶根水氏

奔水氏

神農納奔水氏爲妃

原伯氏

左傳周原伯綏之後因氏焉今澤州沁水有原城晉孝
公時原伯蓋見英賢傳

溫伯氏

周邑也地在河陽縣温西南

渾沌氏

太昊佐渾沌氏

昆吾氏

名樊爲已氏祝融之孫陸終第二子封於昆吾是爲昆吾衛昆吾爲夏伯夏衰遷于舊許楚之先也

上平聲

十四寒

安邱氏

見嵇康聖賢高士傳

歷代名賢

漢

安邱望之字仲都京兆長陵人少持老子經恬靜不求進宦號曰安邱丈人漢成帝聞欲見之辭不肯見爲巫醫于

氏姓譜

卷百五十

十三元

渾沌氏

四

人間扶風耿况與王莽從弟伋共學老子于安邱先生

安國氏

安國少季漢武帝詔使南越見姓氏英賢傳

韓褐氏

姬姓英賢傳云晉韓厥之後韓子云趙肅侯大夫韓褐

晉居

安是氏

見英賢傳安是叔施晉厲公大夫

干已氏

陳大夫干徵師食采于已因氏干已衍漢京兆尹

安期氏

英賢傳安期生古仙人又漢有安期生蒯通友人

歷代名賢

漢

安期生齊人與蒯通友善秦時賣藥海濱蓋以于歲以策于項羽羽不用避去嘗以神樓一七愈李少君疾今廣州府城址昔蒲瀾乃生昇仙地也

端木氏

見姓譜

歷代名賢

周

端木賜字子貢衛人少孔子三十一歲齊景公問于貢曰子何師對曰魯仲尼日仲尼賢乎曰聖人也豈直賢哉景公曰其聖何如子貢曰不知也景公作色曰始言聖人今言不知何也子貢曰賜終身戴天不知天之高終身踐地不知地之厚也賜之事仲尼譬之湯操壺杓就江海而飲

氏姓譜

卷百五十

十四

安邱氏至

五

之滿腹而去又安知江海之深乎景公曰子得無太譽乎子貢曰賜何敢譽尙慮不及耳賜譽仲尼譬猶兩手捧土而附泰山其無益亦明矣使不譽仲尼譬猶兩手挹泰山其無損亦明矣景公曰善哉豈其然乎魯哀公十二年吳徵會于衛衛辭吳盟吳人藩衛侯之舍子貢乃束錦以行見太宰嚭語及衛故語曰衛君之來也緩寡君懼故將止之子貢曰衛君之來必謀于衆或欲或否是以緩來其欲來者子之黨也其不欲來者子之仇也若執衛君是墮黨而崇仇也合諸侯而執衛君或者難以霸王嚭乃舍衛侯齊田常欲作亂憚高國鮑晏故移其兵欲以伐魯孔子聞之謂門弟子曰夫魯墳墓所處父母之國國危如此二三子何爲莫出子路請出孔子止之子張子石請行孔子弗許子貢請行夫子許之遂行至齊說田常曰君之伐魯遇

矣夫魯難伐之國其城薄以卑其地狹以泄其君愚而不仁大臣僞而無用其士民又惡甲兵之事此不可與戰君不如伐吳夫吳城高以厚地廣以深甲堅以新士選以飽重器精兵盡在其中又使明大夫守之此易伐也田常忿然作色曰子之所難人之所易子之所易人之所難而以教常何也子貢曰臣聞憂在內者攻強憂在外者攻弱今君憂在內吾聞君三封而三不成者大臣有不聽者也今君破魯以廣齊戰勝以驕主破國以尊臣而君之功不與焉則交日疎于主是君上驕主心下恣羣臣求以成大事難矣夫上驕則恣臣驕則爭是君上與主有郤下與大臣交爭也如是則君之立于齊危矣故曰不如伐吳伐吳不勝民人外死大臣內空是君上無強臣之敵下無民人之過孤主制齊者惟君也田常曰善吾兵業已加魯矣去而

氏姓譜

卷百五十

十四卷

端木氏

六

之吳大臣疑我奈何子貢曰君按兵無伐臣請往使吳王令之救魯而伐齊君因以兵迎之田當許之使子貢南見吳王說曰臣聞王者不絕世霸者無強敵千鈞之重加銖兩而移今以萬乘之齊而私千乘之魯與吳爭強竊爲王危之且夫救魯顯名也伐齊大利也以撫泗上諸侯誅暴齊以服強晉利莫大焉各存亡魯實困強齊智者不疑也吳王曰善雖然吾嘗與越戰棲之會稽越王苦身養士有報我心子待我伐越而聽子子貢曰越之勁不過魯吳之強不過齊王置齊而伐越則齊已平魯矣且王方以存亡繼絕爲名乃伐小越而畏強齊非勇也今存越示諸侯以仁救魯伐齊威加晉國諸侯必相率而朝吳伯業成矣且王必惡越臣請東見越王令出兵以從此實空越各從諸侯以伐齊也吳王大悅乃使子貢之越越王除道郊迎身

御至舍而問曰此蠻夷之國大夫何以儼然辱而臨之子
貢曰今者吾說吳王以救魯伐齊其志欲之而畏越曰待
我伐越乃可如此則破越必矣且夫無報人之志而令人
疑之拙也有報人之意而使人知之殆也事未發而先聞
危也三者舉事之大患句踐頓首再拜曰孤嘗不料力乃
與吳戰困于會稽痛入骨髓日夜焦唇乾舌待欲與吳主
接踵而死孤之願也遂問子貢子貢曰吳主爲人猛暴羣
臣不堪國家做于數載士卒勿忍百姓怨上大內變子
胥以諄死太宰嚭用事順君之過以安其私是殘國之治
也今王誠發士卒佐之以邀其志重寶以悅其心卑辭以
尊其禮其伐齊必也彼戰不勝王之福矣戰勝必以兵臨
晉臣請北見晉君令共攻之弱吳必矣其銳兵盡于齊重
甲困于晉而王制其敝此滅吳必矣越王大悅許諾使大

氏姓譜

卷百五十

十四寒

端木氏

七

夫種頤首言于吳王曰東海役臣孤句踐聞大王將興大
義誅強救弱困暴齊而撫周室請悉起境內士卒三千人
孤請自披堅執銳以先受矢石因越賤臣種奉先人藏甲
二十領屈廬之矛步光之劍以賀軍吏吳王大悅以告子
貢曰越王欲以身從寡人伐齊可乎子貢曰不可夫空人
之國悉人之衆又從其君不義君受其幣許其師而辭其
君吳王許諾乃謝越王于是吳王乃遂發九部兵以伐齊
子貢因去之晉謂晉君曰臣聞之慮不先定不可以應卒
兵不先辯不可以勝敵今夫齊與吳將戰彼戰而不勝越
亂之必矣與齊戰而勝必以其兵臨晉晉君大恐曰爲之
奈何子貢曰修兵修卒以待之晉君許諾子貢去而之魯
吳王果與齊人戰于艾陵大破齊師獲七將軍之兵而不
歸果與兵臨晉與晉人相遇于黃池吳晉爭疆晉人擊之

天敗吳師越王聞之涉江襲吳去城七里而軍吳王聞之去晉而歸與越戰于五湖三戰不勝城門不守越遂圍王官殺夫差而戮其相破吳三年東向而伯孔子曰夫其亂齊存魯吾之初願若彊晉以徹吳使吳亡而越伯者賜之說也美言傷信慎言哉子貢嘗相魯衛家累千金卒終于齊

明

端木以善句容人洪武中以儒士歷尚書

端木孝文深水人以善子與弟孝思皆以儒士起家孝文爲翰林待詔孝思爲翰林侍書先後使朝鮮以清節爲遠人所服立雙清

完顏氏

見姓譜

氏姓譜

卷百五十

十四卷

端木氏

八

歷代名賢

完

完顏弼本名達吉不蓋州蓀安人充護衛轉十人長從丞

相襄成邊功最除德州防禦同知武衛軍鈐轄轉宿直將

軍深州刺史泰和六年從完顏匡攻襄陽破雷太尉兵積

功加平南盪江將軍母憂起復除南京副留守壽州防禦

使大安二年入爲武衛軍副都指揮使遣領兵駐宣德會

河之敗弼被劄馬中流矢得押軍千戶夾谷王家奴馬而

免俄遷右副都點檢至寧元年以禦遼東拜元帥左監軍

請自募二萬人爲一軍京師有急可以回戈自救衛王怒

曰我以東北路爲憂卿言京師有急何耶就如卿言我自

有策以卿皇后連姻故相委寄乃不體朕意顧提點近侍

局駙馬徒單沒烈曰何不叱去有司論以奏對無人臣禮

詔免死決杖降雲內州防禦使宣宗卽位驛名赴中都時雲內已受兵弼善馬稍與數騎突圍而出有詔除定武軍節度使尋爲元帥左都監駐眞定條奏軍中五事一外兵日增軍無闔志遇有逃歸自陳戰潰以希存恤收撫見聞習熟相憫成風自今村寨城邑兵退之後有心力勇敢可使者方招用之二河朔郡縣皆以文自拘不相應救坐致殘破自今嚴督州府凡有告急卽須赴救違者坐之三河北軍器乞權宜弛禁仍令團結堡寨以備外兵四今雖議和萬一復來願速講防禦之策五勸遷都南京阻長淮拒大河扼潼關以自固宣宗從之以兼河北西路兵馬都總管車駕至眞定奏言皇太子不可留中都恐軍少則難守軍多則難養又奏瑞州軍頗狡左丞盡忠多疑乞付他將言皆用之大名軍變殺蒲察阿里詔弼鎮撫之未幾改陝

氏姓譜

卷百五十

十四寒

完顏氏

九

西路統軍使移文問宣撫副使京兆都總管烏古論充州擅置秦州權場兗州曰近日入見許山外從宜行事秦州自宋兵焚蕩摧場幾一年矣今旣安帖復宜開設彼此獲和朝議亦以對境天水軍移文來請苟利于民卽專之亦可三年改知東平府事山東西路宣撫副使遣人招劉三祖餘黨孫邦佐張汝楫以書來云我輩自軍興屢立戰功主將見忌陰圖陷害竄伏山林以至今日實畏死耳如蒙濬洗便當釋險面縛盡招餘賊未降者弼奏方今多故此賊果降亦了一事乞明示以官賞有詔各遷五官選授邦佐濰州刺史汝楫淄州刺史皆加明威將軍又薦二人改過用命招降甚衆來者收其兵仗放歸田里詔選授邦佐益都府同知汝楫東平府同知再加懷遠大將軍梁聚寬泰定軍節度副使加宣武將軍四年弼遷宣撫使已而邦

佐密告汝楫復謀作亂弼設饗伏甲廡下密殺汝楫并其黨與手詔褒諭封密國公其後邦佐屢立功元光末累官知東平府山東西路兵馬都總管充宣差拾撫使元兵圍城百計應戰久之乃解賜詔獎諭將士賞賚有差以疽發于腦詔太醫診視賜御藥俄卒弼平生無所好惟喜讀書閑暇延引儒士歌詠投壺以爲常所辟如承齋陀滿胡士門紇石烈牙吾塔皆立方面功治東平愛民省費井邑之間軍民無相訟有古良將之風

完顏安國字正臣其先古籍土京世有戰功祖斜婆授西南路世襲合札謀克安國性沉雅有謀畫尤善騎射正隆元年從軍常以少擊衆大定中爲常山簿轉虹縣令選充虞王府掾遷儀鸞局副使明昌元年改本局使往使大石許其部長入修歲貢既至率衆遠迓至帳望闕羅拜執禮

氏姓譜

卷百五十

十四寒

完顏氏

十

無忒會阻鞬廼塞隣部欲立功以誇雄上國議邀安國俱行辭以未奉詔強之不可休以危言亦不爲動衆壯其人餽贖如禮還以奉使稱旨升武衛軍都指揮使以左衛將軍充西北路副招討從夾谷清臣出兵爲先鋒都統適臨潢泰州屬部叛安國先討定之以功遷本路招討使兼威遠軍節度使承安元年大鹽澤之戰殺獲甚衆詔賜金幣旣而丞相襄總大軍進爲兩路都統大捷於多泉子襄遣安國追敵僉言糧道難繼不可行安國曰人得一羊可食十餘日不如驅羊以襲之衆愧其言卽統所部萬人疾驅以薄之降其部長提聞進官四級遷左翼都統二年以營邊堡功授簽樞賜虎符得便宜從事並降塞諸部諭使輸貢如初進拜樞密副使於祖蔭上加授世襲西南路延慶河猛安泰和元年帝幸慶寧宮特命嚴飭邊備奏乞招

誘西南路邊戍私竄者以安人心上是其言三年以疾致仕封道國公四年復起前職卒上聞輟朝勅有司葬以執政禮贈特進凡在軍旅幾十五年號令嚴明指麾卒伍如左右手又善伺知敵人虛實及山川險易戰必身先士卒故所向輒克諸部入貢者能一一呼其祖先弟姪名字以伸戒諭聞者震悚甚畏服之

完顏合達名瞻字景山少長兵間習弓馬能得人死力貞祐初以親衛軍送岐國公主充護尉三年授臨潢府推官隸經畧使烏林答乞住以便宜授中軍都統至提控佩金符時臨潢與全慶兩州之民因避遷都共壁平州及是爲變殺乞住共推合達爲統帥以討誅亂首數人六月元將噶得不遣監戰提軍至平州令州人黃裳入城招降父老不從合達引兵逆戰知勢不敵臨陣而降留北半歲令還氏姓譜

卷百五十

十四年 完顏氏

十一

守平州謀自拔歸四年十一月率所部及州民奔海西南歸國詔授鎮南軍節度使充宣差都提控駐益都與蒙古綱相應接十二月元兵徇博興樂安壽光東涉濰州之境綱遣率兵屢戰於壽光臨淄興定元年累轉通遠平西二州節度使二年擢知延安府兼鄜延路兵馬都總管夏人犯通秦砦合達出兵安寨堡以擣其巢抵隆州破步騎二千斬首數十級俘十人衆潰進薄城下陷其西北隅會日暮乃還三年伐宋以爲元帥右都監破宋兵于梅林關擒統領張時又敗宋兵于馬嶺堡獲馬百匹拔麻城縣獲其令張侗幹辨官郭守紀六月命行唐鄧元帥府事遣論以卿才幹委以是任無使敵人侵軼第固吾圍可也四年正月復移屯延安十月夏人攻綏德州駐兵于挂天山合達將兵擊之別遣先鋒提控樊澤等各率所部分三道以進

會于山巔夏人數萬傅山而陣縱兵分擊澤先登推其左
軍諸將繼攻其右敗之五年五月擢知延安府事十一月
夏人攻安寨堡與征行元帥納合買住禦之潛軍裏糧倍
道兼進夜襲其營追殺四十餘里墜崖谷者不可勝計上
聞各賜金幣下詔獎諭因以其功徧諭河南帥臣十二月
又與買住戰延安皆被重創以保護功各賜金帶玉吐鶴
與重幣元光元年遷元帥左監軍授山東西路吾改必刺
世襲謀克爲京兆行省參知政事千戶張子政等殺萬戶
陳敘將掠城中合達勤兵爲備賊出走因追及斬首惡數
十人軍乃定二年二月以保鳳翔功進官賜金幣及通犀
帶時河中已破合達提兵復取之正大二年七月陝西旱
甚合達齋戒祈雨卽樹歲以大稔民立石頌德延安旣殘
毀令於西路買牛付主者招集散亡助其耕墾自是其民

氏姓譜

卷百五十

十四寒

完顏氏

主

稍復耕稼之利八月鞏州田瑞反命討之移文諭諸軍罪
止一身餘無所問不數日弟濟殺瑞以降悉如所約撫定
一州民賴以寧三年詔遷平涼行省四年二月徵還拜平
章政事封芮國公蒲阿面奏合達在軍中久今多事之際
用違其長臣等欲與協力軍務擢之相位似亦未晚改授
樞密副使七年十月己未朔詔與蒲阿救衛州河朔諸軍
圍衛已連月內外不通旣至先以親衛兵三千嘗之扎兵
稍退翼日圍解上登承天門犒軍皆授世襲謀克賜良馬
玉帶月俸全給本色未幾以權參知政事同蒲阿行省事
於闐鄉以備潼關議者謂止可助陝西兵以決一戰使陝
西不守河南亦不可保入年正月比帥速不斛攻破小關
殘盧氏朱陽散漫百餘里兩省出軍闐鄉至灑池不動障
關總帥納合買住率夾谷移剌烈都尉高英拒之事急求

救遣陳和尙忠孝軍一千都尉夾谷渾軍一萬往應北軍
退追至谷口而還兩省輒稱大捷以聞既而北軍攻鳳翔
兩省提兵出關二十里至華陰界與渭北軍交戰至晚復
收兵入關鳳翔破遂棄京兆而還既而謀知大軍已還河
朔上大喜初合達謀渡淮取淮陰主將胡路鈴往與楊妙
眞計事提控官郭恩隨送降款比胡路鈴還不納慟哭而
去合達遂入淮陰詔改爲歸州以行省烏古論葉里哥守
之郭恩爲元帥右都監頌之宋人以銀絹五萬兩匹來贖
盱眙留使館中恩謀劫而取之報于宋帥劉虎湯孝信卽
遣部將夏友諒來攻恩不及發泗州總領完顏矢哥利館
中銀絹遂反防禦使徒單塔刺聞變拒戰不勝好語之日
容我拜辭朝廷然後就死遂取朝服望闕拜哭良久自投
興山亭下水中矢哥遂以州還楊妙眞買住亦以盱眙降

氏姓譜 卷百五十 十四寒 完顏氏 三

宋九月議陝西行省防秋時大兵在河中詔合達還陝量
以軍馬出冷水谷以爲聲援十一月北兵道饒峯闖由金
州而東詔兩省軍復入鄧州遣提控劉天山以劄付于襄
陽制置司約同禦北兵且索軍食宋制使陳該怒辱天山
且以惡語復之八年十二月丙子大兵渡江與戰于禹山
之前北帥以旗聚諸將議良久合達知其將退時高英軍
方北顧而北兵出其背擁之英軍動合達將斬英英復督
軍力戰北兵稍却英軍定復擁樊澤軍合達斬一千夫長
軍殊死鬪乃却之營于三十里之外以大捷聞百官表賀
宰相置酒省中左丞李暉以爲實然且喜且泣曰非今日
之捷生靈之禍可勝言哉河南百姓聞捷書至盡爲所誤
始入城壁保險固者至是皆出不二三日游騎至悉無所
逃懼敵乘虛襲城復謀入援時敵遣三千騎趨河上已

十餘日破泌陽南陽方城襄陽諸縣所有積聚焚燬無餘
我軍由鄧而東反無所仰給乃並山入陽翟北兵隨襲之
且戰且行北兵傷折亦多忽大霧四塞少刻霧散前沮大
澗長澗數里明日至三峯山軍遂大潰乃引數百騎走鈞
州北兵塹其城攻圍之走不可出匿窟室中城破被殺朝
廷不知其死賜以手詔募人訪之北兵揚言汝家所恃惟
黃河與合達耳今合達爲我殺黃河爲我有不降何待上
如痛惜之生平熟知敵情習于行陣輕財重義與士卒同
甘苦有俘獲卽分給之遇敵常身先不避衆亦樂爲之用
左丞張行信嘗薦之以爲今時良將

完顏伯嘉字輔之北京路訛魯古必刺猛安人明昌二年
登第調中都左警巡判官孝懿皇后妹晉國夫人家奴買
漆不酬直鈎致繫獄晉國白章宗特命酬價用是豪右屏

氏姓譜

卷百五十

十四寒

完顏氏

古

迹改寶坻丞補尙書省令史除太學助教遷監察御史因
劾平章僕散揆遷平涼治中轉莒州刺史屬縣有盜得錢
二千經月見在駁曰飢寒爲盜何得許久不用此必官兵
捕他盜不獲証以準罪耳詰之果然俄詔與按察官推排
物力得名見香閣大安中二遷西京留守同知權本路安
撫使貞祐初轉順義軍節度使居父母喪起復震武軍兼
管撫副使提控大和嶺諸隘白副統李鵬飛誣殺彰國軍
節度使牙改反坐其罪又奏西京副統程瑛智勇過人持
心忠孝以私財募壯士集至二萬復取渾源白登有恢復
山西之志臣恐或失機會輒擬瑛勇大將軍西京留守
同知兼領一路義軍給以空名勅二十道許擇有謀畧者
充州縣官制可仍賜瑛姓完顏氏遷伯嘉元帥左監軍知
太原府河東北路宣撫使尋改知歸德府召簽樞密院事

未閱月改知河南府河南甫經兵後軍民乏食令輸糶粟
萊根足之咸以爲便興定元年知河中府充宣差都提控
未幾召爲吏部尙書二年改御史中丞劾前兵部尙書箴
樞密院事蒲察阿里不孫備禦潼關陝州兵次沔池不戰
而潰因而逃逸變易姓名匿拓城縣與其妻妹前韓州刺
史合喜男婦紇石烈氏獄民舍居止御史完顏藥師劾請
窮治有詔釋之五月時值久旱以充宣差河南提控捕蝗
許決四品以下官宣宗憂旱伯嘉奏曰日者君之象陽之
精今日之旱乃聖主自用亢極之象宰相諂諛百司失職
實此之由猥乃歸咎有司以爲冤獄所致高琪武弁出身
回不足論汝弼輩亦坐不知其罪大矣會禮部郎中抃撚
胡魯刺以言事件旨集五品以上官顯責之伯嘉諫曰自
古帝王莫不欲法堯舜而耻爲桀紂凡以堯舜納諫桀紂

氏姓譜

卷百五十

十四寒 完顏氏

十五

拒諫故也若胡魯刺所言是無益于身所言不是無損于
國矧近日有司坐言事者誹謗重典陛下釋之與其釋之
以爲恩曷若置之而不問乎人臣有忠國者有媚君者忠
國者或拂君意媚君者不爲國謀如近日宰相請修山寨
以避兵獨不見陳後主之入井乎假令得生必不能爲國
矣十二月以權元帥左監軍行元帥府于河中控制河東
南北路便宜從事會廷議欲棄河東徙其民以實陝西伯
嘉至河中上書極論中原之有河東如人之有肩背萬一
失之恐未易取因大忤宰執意名還四年秋河南大水兪
充宣慰副使按行京東奏亳州災最甚合免三十餘萬石
三司止奏除十萬石民將重困惟陛下憐之詔乃治三司
奏災不以實罪行至蘄縣聞前有紅襖賊不敢進御史烏
古孫奴申劾之降授歸德府同知五年起爲彰化軍節度

使改翰林侍講學士元光二年徙節集慶軍權河中行省
參知政事率陝西精銳與平陽公史詠共復河東頃之有
疾卒伯嘉純直不能與時低昂嘗曰生爲男子當益國澤
民其他不可學也故在任上疏獨多時不能用識者恨之
完顏素蘭一名翼守伯揚至寧元年策論進士貞祐初累
遷應奉翰林文字轉監察御史宣宗遷汴留皇太子守中
都高琪遣人名之素蘭奏太子在彼則聲勢俱重邊隘有
守而都城可保無虞昔唐明皇幸蜀太子實在靈武蓋將
以繫天下之心也不從竟陷中京車駕至汴素蘭上書干
言皆切時政三年正月還上書求見乞屏左右上遣人諭
之曰屏人奏事朕固常爾近以游茂因緣生疑聞之語故
凡有所引見必令一近臣立侍汝有封章亦無患不密也
尋召至近侍局給紙劄令書所欲言書未及半上出御便

氏姓譜

卷百五十

十四寒

完顏氏

六

殿見之在側惟近侍局直長趙和素蘭因奏臣聞興衰
治亂有國之常在所用之人如何耳用得其人雖衰亂尚
可扶持一或非才則治安亦亂矣向者亂軍之變中都帥
府自足勦滅朝廷乃令穆刺塔不也等招誘之使帥府不
敢盡其力旣不能招愈不可制矣至于伯德文哥之叛帥
府方議削其權反傳詔旨俾領義軍文哥由是益肆改除
之令輒拒不受不臣之狀亦顯矣帥府又議收捕尋復赦
之國家付方面于重臣乃不信在顧養叛賊之姦臣自外
風聞皆出平章高琪之意惟陛下裁察上曰汝言皆是文
哥之事朕所未悉誠如所言朕肯赦之乎且汝何以知此
事皆出於琪素蘭曰臣見文哥牒永清副提控劉溫云所
差人張希韓至自南京道副樞平章處分已奏令文哥隸
大名行省勿復遵中都帥府約束溫卽具言于帥府可見

罪人與高琪計結明其上領之復奏丞相福興國之勳舊
乞名還京以鎮雅俗付左丞彖多以留後事上曰如卿所
言二人得無相惡耶對曰福興彖多同心同德無不協者
上曰都下事殷恐丞相不可輟素蘭曰臣聞朝廷正則天
下正不若令福興還以正根本四年三月命體問外路官
廉幹者擬不差遣若懦弱不公者罷之具申朝廷別議擬
注詔有司議行之時哀宗爲皇太子新設師保贊諭之官
多非其人素蘭上言臣聞太子天下之本欲治天下先正
其本正本之要在選人以補翼之耳昔成王在襁褓中卽
命周公以爲師保戒其逸豫之心告以持守之道終之功
光文武垂休無窮欽惟陛下順天人之心預建春宮皇太
子仁孝聰明出于天資總制樞務固已綽然有餘儻更選
賢如周召之儔者使之夾輔則成周之治不足伴矣上稱

氏姓譜

卷百五十

十四寒

完顏氏

十七

善未幾擢爲內侍局直長每進言多有補益尋遷諫議大
夫進侍御史興定二年四月蒲鮮萬奴叛上以近侍局副
使完顏訛可性頗率易特命素蘭同赴遼東詳察事幾今
止居鐵山若復遠去朕恐難得其耗將行上言臣近請宣
諭高麗復開互市事詔付行省今若就遣諭之不過鄰境
領受使聖恩不達如遣信使明持恩詔諭之貸糧開市二
者必有一濟苟俱不從則其曲在彼然後別可議圖上是
其言遣與劉炳從行及還授翰林待制正大元年正月轉
刑部郎中時南陽人布陳謀叛坐繫者數百人司直白華
言此獄註誤者多新天子方務寬大比得昭雪多死于撈
笞之下者素蘭命華及檢法邊澤分別當死當免者以聞
止坐首惡及擬僞將相者數人餘悉釋之七年七月權元
帥右都監京兆行省叅知政事未幾遷金安軍節度使兼

同華安撫使召還至陝被圍久之亡奔行在道中遇害素
蘭蒞官以修謹得各然苛細不能任大事較之流輩頗有
可稱其居父喪不飲酒廬墓三年時以爲難

完顏閻山蓋州猛安人累調觀察判官補尙書省令史知
管差除出爲河東南路轉運都轉運都勾判官改南京警
巡使母憂起復南京按察判官遷沁南軍節度入爲工部
尙書貞祐三年知京兆府四年改知鳳翔興定元年以權
元帥右都監參議陝西行省伐宋諸軍事遇宋兵千餘伏
吳寨谷閻山率騎兵掩擊敗之追襲十五里殺三百餘人
獲牛羊于計奉旨清野令百里之內留桑棗菓木餘皆
伐之行省胥鼎言方今秋收乃爲此舉旣不能禦敵而又
害民非計也且一朝警急其所伐木豈不資敵乎乃止未
幾改知平涼府敗宋人于步落塌香爐堡遷官一階三年

氏姓譜

卷百五十

十四寒 完顏氏

十六

名爲吏部尙書廷議選戶部官往往多舉聚斂苛刻以稱
時尙間山獨不肯嘗嘆民勞至矣復用此輩將何以堪識
者稱之未幾以晋安行元帥府陀滿胡土門暴刻命關山
代之是歲十月遂卒

完顏承暉字維明本名福興好學淹貫經史襲父益都尹
鄭家塔割刺訛沒謀克大定十五年選充符寶祿候遷筆
硯直長調中都右警巡使章宗爲皇太孫選充侍正卽位
進近侍局使嘗夜詔開宮門名孝懿皇后妹夫吾也藍承
暉不奉詔明日奏吾也藍得罪先帝不可名上善之未幾
遷兵部侍郎兼右補闕選除東京延平等路提刑副使豪
猾屏息改上京留守同知歷臨海利涉遼海三軍節度使
至北京路提刑使知延平臨潢二府副李東陽爲北京樞
守東陽素驕貴自非公事不與交一言名爲刑部尙書恭

知審官院駁奏平章徒單鑑甥余里痕都以蔭得官別無才能前爲大陽渡譏察纔八月擢惠民司都監已爲太優今乃起授隨朝八品織染署直長多涉物議上名鑑深責之尋知大興府權貴頗不樂復改知大名府兩潦害稼爲決引潦水納之濠隍伐宋遷山東路統軍使會有盜起奏猛安謀克以下皆得權行的決俟事定依例奏聞俄拾降賊魁餘黨潛匿泰山按察使請刊除林木深入勦捕奏以五岳之宗不宜擅伐矧齊人易動驅以入山誨之使盜議遂寢改知興中府衛紹王立名爲御史大夫拜參知政事駙馬徒單沒烈與其父南平干政事大爲姦利面質其非俄進宣德行省尚書左丞坐參政承裕敗績于會河堡除名至寧元年起爲橫海軍節度使貞祐初召拜尚書右丞卽日入朝妻子留滄州城破皆死胡沙虎伏誅拜平章政

氏姓譜

卷百五十

十四寒

完顏氏

九

寧兼都元帥封鄒國公中都祿圍遣出議和遷汴進右丞相金紫光錄大夫徙封定國公與皇太子留守中都頃之太子去蒲察七斤以其軍出降城中皆無固志承暉以死固守恐不能持久遣人間道以礮寫奏若一失中都遼東河朔皆非我有諸軍倍道來援猶冀有濟詔乃趣諸路兵糧俱往赴救高琪忌其成功所遣左監軍刑部侍郎阿典宋阿右都監眞定女奚烈胡論出行六部尚書侯摯往來顧望終無一兵至者隨聞抹撻盡忠謀河南奔亟召帥府經歷完顏師姑問曰始我謂盡忠知兵故推赤心相托嘗許與我同死今忽異議社稷若何師姑不能對叱下斬之承暉起辭家廟名左司郎中趙思文語之曰事勢至此惟一死可以報國作遺表付本省令史師安石引咎拜歸論國家大計辨君子小人治亂之本歷指高琪賦性陰險

報復私憾竊弄威柄包藏禍心終害國家盡出財隨家人年勞多寡分之各與從良皆號泣不敢仰視徐仰藥死貞祐三年五月二日也宣宗聞之設奠于相國寺哭之盡哀贈開府儀同三司承暉生本貴俊居常類寒素于五經皆經師授謹守而力行之不爲虛文師法司馬光尚友蘇軾每置二人像于書室平章完顏守貞素敬之與爲忘年交完顏彛字良佐豐州人小字陳和尚系出蕭王諸孫父乞哥泰和南征以功授階州同知宋復階州戰歿於嘉陵江從兄斜烈各鼎宇國器畢里海世襲猛安以善戰知名自壽泗元帥轉安平都尉鎮商州威望甚重敬賢下士有古賢將之風得歐陽修子孫併其族屬鄉里三千餘人皆縱遣之貞祐中彛爲元兵所掠其帥甚愛之置帳下時母尚留豐州鼎事之甚謹彛在元歲餘託以省母乞還帥以卒

氏姓譜

卷百五十

十四寒 完顏氏

三

監之至豐卽劫殺監卒奪馬奉其母舉家南奔元兵追之由他路得免兄弟共輓鹿車載母渡河宣宗授鼎都統彛補護衛彛天資高明雅好文史人以秀才目之未幾轉奉御從鼎壽泗帥府充宣差提控佩金符鼎辟太原王渥字仲澤者爲經歷文章論議與雷淵李獻能相上下故得師友之授以孝經小學論語春秋左氏傳畧通其大義遇軍中無事于窗下作牛毛細字如寒苦之士其視世味漠如也正大二年鼎落帥職爲總領屯方城復隨以往凡軍中事皆預知之鼎一日病不出鎖防軍葛宜翁素凶悍與李太和相毆訴于彛彛不直宜翁量加笞責宜翁因耻受杖死其妻訟爲故殺當以大辟聚書獄中讀之明年鼎病愈詒提兵而西入見哀宗怪其瘦甚未幾遂卒上聞亟馳赦彛諭以汝兄死失吾一名將今故曲法赦汝他日奮發防

功國家得汝力始以我爲不妄赦矣爨泣且拜退以白衣
領紫微軍都統踰年轉忠孝軍提控五年元兵入大昌原
平章合達命爲前鋒卽沐浴易衣若將就木者擐甲上馬
不反顧是日以四百騎破入千衆三軍之士踴躍而言自
軍興二十年始有此捷奏功第一手詔褒諭授定遠大將
軍平涼府判官世襲謀克自此各動天下時忠孝軍皆回
紇羌渾及中原被俘避罪來歸者鷲狼凌突最虓難制以
御之有方坐作進退皆中程式所過州邑給常料外秋毫
無犯街曲不復喧雜每戰則先登陷陣疾若風雨諸軍倚
以爲重六年有衛州之勝八年有倒回谷之勝自刑徒未
五年遷爲禦衛中郎將坐與同列私議移刺大將軍蒲阿
無待重之畧今日得生口三百明日得牛羊一二千士卒
喘死則不復計國家積年兵力皆爲是人破除盡矣蒲阿

氏姓譜

卷百五十

十四寒

完顏氏

三

聞之置酒會諸將語以汝曾短長我誠有之否徐應曰有
蒲阿見其無懼容慢爲好語云有過當面論無後言也合
達復入鄧州留于閬鄉南十五里乃行爨亦隨而往九年
正月三峯山敗城破縱軍巷戰敵欲降之砍足折脛不爲
屈割口吻至耳喫血而呼至死不絕自言我忠孝軍總領
陳和尚若死亂軍中人將謂我負國家今日明白死天下
必有知我者元將義之酬以馬渾祝曰好男子他日再生
當令我得之時年四十一詔贈錮南軍節度使塑像褒忠
廟勒石紀其忠烈

完顏仲德

本名忽斜虎谷懶路人少穎悟不羣讀書習策

論有文武才試補親衛軍普不廢業泰和三年登第歷仕
州縣貞祐用兵辟充軍職嘗爲元兵所俘不踰年盡解其
語因率諸降人萬餘來歸宣宗召見授邳州刺史兼從宣

爲敵衝難守賴以增築城壘匯水環之守因以固哀宗
授歸德同知轉徐州行院同簽樞密事徐城三面皆
臨黃河南獨平陸至則疊石爲基增城之半復浚隍引水
郡民以安正大五年改行關陝以南元帥府事以備小關
方與前帥奧屯阿里不朮酒更代元兵猝至長驅而東有
司劾阿里不素乏守禦之策罪當死仲德上書自咎元兵
越關之際符印已交臣請受戮上義之止杖阿里不而貰
其死六年移知鞏昌府兼行總帥事時陝西諸郡已殘困
招集散亡得軍數萬依山爲寨屯田積穀人多歸之天興
元年九月拜工部尙書陝州行省參知政事遇元典新敗
州已殘破仲德復立山寨安撫軍民蠟書徵入救援諸路
皆觀望不進或中道輒潰乃獨提千人歷秦藍商鄧擷果
菜爲食間關至汴適上東遷妻子留京師五年不入其家

氏姓譜

卷百五十

十四寒 完顏氏

三

竟趨宋門見上知欲攻衛州叩馬力諫言雖不用然素重
其名且嘉其赴難進拜尙書右丞兼樞密副使及駕至歸
德復以仲德行尙書省于徐州旣至遣人與國用安通問
沛縣卓翼孫璧冲者初投用安用安封翼爲東平郡王璧
冲博平公升沛縣爲源州至是來歸昇以舊職令統河北
諸砦行源州帥府事徐守王德全畏仲德用安累檄人援
不赴至是遣人納奏求赴歸德仲德留之不遣云徐州重
地德全不宜離鎮心乃懷疑仲德日觀書亦無兵衛自防
初完顏忽土以遙授徐州節度往督嚴祿軍于永州北保
安鎮時祿已爲從宜在碭山數年又得土心忽土到軍士
不悅二月辛卯夜遂爲魚山總領張璫崔振所害徐州去
保安百里仲德累議討之德全不從卽領麾下并勸率民
兵得三百人徑往魚山會忽土下經歷吏訶郎中張敏修

以軍變脇祿降北祿佯應之陰召永州守陳立副招撫郭昇會諸義軍赴保安鎮誅作亂者軍夜至祿遣敏修召職振討事二人不疑皆至及其黨與皆爲祿所殺事已反正仲德以便宜令祿權行元帥左都監就佩忽士虎符撫安軍民而還朝廷授祿遙領歸德知府兼行帥府事未幾元將阿朮魯兵至保安祿夜遁遂投澠水敏修入徐又有曹總領者盜御馬東行詔諭行省討之時仲德已殺賊德全欲功出已復殺曹黨四十餘三月阿朮魯攻蕭縣游騎至徐德全馬悉爲所邀以失馬故始議救蕭遣張元哥苗秀昌率騎八百以往未及交戰元哥退走元兵掩之皆爲擒殺蕭縣遂破乃因失律執德全并其子殺之餘黨之外一無所問闔郡稱快五月詔仲德赴行在代以抹撚兀典行徐州省事郭恩爲總帥兼節度使官屬以蒲察官奴爲亂

氏姓譜

卷百五十

十四寒 完顏氏

三

懼爲所紿勸勿往果得其詐六月詔議遷蔡仲德雅欲奉上西幸因贊成之至蔡領省院事無鉅細率親爲之選士括馬繕治甲兵志甚堅銳會近侍左右久困睢陽今幸卽安皆娶妻營業不願遷徙日夕爲上言西行不便仲德每深居燕坐瞑目太息以不得西遷爲恨及上命有司修見山亭同知衙爲遊息之所仲德諫止之會忠孝軍提控李德十餘人乘馬入省大呼月糧不優仲德大怒縛德堂下杖之六十上諭以此軍得力方欲倚用卿可加容忍對曰時方多故錄功隱過自陛下之德至于將帥之職小犯則決大犯則誅強兵悍卒不可使一日不在紀律軍士聞之不敢有犯初有司定減軍糧人尤怨望上聞之欲分軍爲三上軍月給八斗中七斗下六斗復怨不均仲德謀立射格自是上中軍輒多獲人益爲勸時以蔡受圍丁男皆乘

城仲德妻尙在汴聞崔立變自毀其容服攜妾及二子走
蔡語仲德曰事勢若此丈夫能爲國出力婦人獨不能耶
因率諸命婦自爲一軍親運矢石于城下城中婦女爭出
繼之仲德守蔡營畫禦備未嘗一至其家捐存軍士務得
其權心將校有戰亡者親臨賻祭哭之盡哀巳丑西城破
仍于城上立柵兩軍相去僅百餘步仲德摘三面精銳日
夕禦戰終不能拔三年正月庚子朔元兵以正旦會飲鼓
吹相接城中飢窘愁嘆而已時四帥三都尉已戰沒餘總
帥以下盡出禁近至舍人牌印省部掾屬亦皆供役戊申
大兵鑿西城爲五門仍督軍鏖戰及暮乃退來日復來又
率精兵巷戰自卯及巳俄見子城火起聞上自縊因語將
士君亡吾事畢矣遂赴汝水妻亦自盡仲德狀貌不踰常
人平生喜怒未嘗妄發聞人過常護諱之雖在軍旅手不

氏姓譜

卷百五十

十四寒

完顏氏

三

釋卷門生故吏每以各分教之家素貧敝衣糲食迄于終
身雅好賓客及薦舉人材凡有寸長極口稱道其掌軍務
賞罰明信號令嚴整道不拾遺故所至軍民樂爲之用至
危急死生之際無一士有異志者南渡以後將相文武忠
亮始忠無瑕一人而已

完顏絳山系出始祖爲哀宗奉御蔡城被圍民爭求出上
遣近侍官分監四門聽日出老稚羸疾千人仍留壯者絳
山時在北門憫人飢苦出週其數命杖之四十俄出者多
泄城中虛實復止及城破哀宗自縊權黥檢內族斜烈孺
制名承御石蓋氏及侍從官巴良弼阿勒根文卿皆從死
遺言絳山使焚幽蘭軒火方熾元兵突入左右皆走獨絳
山不去爲兵所執問以何獨不去答曰吾君終于是將候
火滅灰寒收瘞其骨耳兵笑曰若眞狂者汝命且不保能

瘞而君耶絳山曰人各事其主吾君有天下十餘年功業弗終身死社稷忍使暴露遺骸與士卒等耶吾逆知今日必死待瘞吾君之後雖寸斬不恨兵以告其帥奔盞曰此奇男子也許之絳山乃撥其餘燼裹以敝衾瘞于汝水之旁再拜號哭將赴汝水死軍士救免後不知所終

完顏從善武宗時知鄒平縣興學教民斷獄明允邑無冤民及去民爲之立石

完顏仁西寧人宏治中山西苛嵐判官

歷代列女

完顏氏婦蒲察氏字明秀鄜州帥納申之女完顏長樂繼室前出妻柴氏生一子撫育如已出哀宗遷歸德以長樂爲總領將兵扈從將行屬曰無他言惟夫人慎之明秀曰

氏姓譜

卷百五十

十四集

完顏氏

三五

君第致身上無以爲念妾必不貽君辱也及聞崔立之變卽以金帛散家人婢僕付之幼子親具衣冠祭物與相訣曰崔立不道強人妻女兵在城下吾何所逃惟一死不負吾夫耳汝等惟善養幼子遂自縊而死時年二十七

完顏氏婦温特罕氏完顏忙哥妻也忙哥從叔父益都節度秦州兵馬元兵攻之適有疾不能軍益都死兵亦隨退及崔立變忙哥義不受辱與妻温特罕氏訣妻曰君能爲國家死我不能爲君死乎其婢亦曰主母死婢將安歸是日夫婦以一繩同縊婢從之

完顏氏婦姓尹氏完顏猪兒妻也猪兒爲南面元帥金天興二年正月從哀宗戰死黃陵岡尹聞夫死隨聚家貲焚之亦自縊年三十一哀宗痛悼贈夫官封尹氏金源郡夫人

完顏氏婦完顏素蘭妻也適崔立之變語所親曰吾夫有天下重名吾豈肯陷身以辱吾夫子即自縊死

干將氏

吳越春秋曰干將吳人也造二劍一曰干將二曰莫邪莫邪者干將之妻名也干將作劍采五山之精合六金之英百神臨觀遂以成劍

安陵氏

戰國策安陵小國侯也其後氏焉安陵纏楚王姬

冠軍氏

漢霍去病封冠軍侯其後氏焉冠軍夷東海王參軍

安平氏

通志云齊將田單封安平君因氏焉

韓餘氏

氏姓譜

卷百五十

十四寒

干將氏至

二六

世本韓宣子餘子之後因氏焉

韓嬰氏

姬姓姓纂云晉韓宣子元孫也為韓嬰氏

韓言氏

姬姓世本晉韓厥生無忌無忌生襄襄生子魚為韓言

氏

韓厥氏

姬姓韓獻子厥支孫氏焉

韓籍氏

姬姓晉韓起之子籍字叔禽為韓籍氏

韓侯氏

通志云周宣王時韓侯支孫氏焉

上平聲

十五刪

顏成氏

曹姓邾婁顏之後有諡成者其後以為氏顏成子游見莊子

下平聲

一先

先穀氏

晉國士氏之別族也隰叔初封於先故以為氏

鮮于氏

子姓鮮音仙商後周武王封箕子於朝鮮支子仲食采於于子孫以鮮于為氏

歷代名賢

鮮

鮮于文宗漁陽人年七歲喪父父以種芋時亡至明年芋時對芋嗚咽如此終身

氏姓譜

卷百五十

十五剛

先顏成氏

三

鮮于世榮漁陽人也父寶業懷朔鎮將武平初贈儀同三司祠部尚書朔州刺史世榮少而沉敏有器幹典和二年為神武親信副都督稍遷平西將軍賜爵石門縣子後頻從文宣討茹茹破稽胡又從高岳平郢州除持節河州刺史食朝歌縣幹皇建中除儀同三司武衛將軍天統二年加開府又除鄭州刺史武平中以平信州賊除領軍將軍轉食上黨郡幹從平高思好封義陽王七年後主幸晉陽令世榮以本官判尚書右僕射事貳比平王比宮留後尋有勅令與吏部尚書袁聿修在尚書省檢試舉人為乘馬至雲龍門外入省北門為憲司舉奏免官後主圍平陽除世榮領軍將軍周師將入鄴除領軍大將軍太子太傅于城西拒戰敗被擒為周武所殺世榮雖武人無文藝以朝危政亂每竊嘆之見徵稅無厭賜與過度發言嘆惜于子

眞武平末假儀同三司

鮮于靈馥漁陽人聚徒教授華陰徐遵明亦講學于趙魏之間而聲譽未高著錄尙寡其弟子上黨李業興乃詣靈馥贊舍類受業者靈馥乃謂曰李生久逐羌博士何所得也業興默爾不言及靈馥說左傳業興問其大義數條靈馥不能對于是振衣而起曰羌弟子正如此耳遂便徑還自此靈馥生徒傾學而就遵明

唐

鮮于叔明字晉閩州新政人世爲右族兄仲通字向天寶末爲京兆尹劔南節度使兄弟皆涉學輕財務施叔明擢明經爲楊國忠劔南判官乾元中除司勳員外郎副漢中王瑋使回紇回紇遇瑋慢叔明日大國通好使賢王持節可汗唐之婿恃功而倨可乎可汗爲加禮復命遷司門郎

氏姓譜

卷百五十

一先

鮮于氏

二

中東都平拜洛陽令招徠遺民號能吏擢商州刺史上津轉運使遷京兆尹長安歌曰前尹赫赫具瞻允若後尹熙熙具瞻允斯久之以疾辭除太子右庶子崔旰擾成都出爲邛州刺史旰入朝卽拜東州節度使遂州刺史徙治梓州建中初吐蕃襲火井掠龍州陷扶文遠三州叔明分五將邀擊走之以功加檢校戶部尙書梁崇義阻命詔引兵下峽戰荆門敗其衆襄州平遷檢校尙書左僕射德宗幸興元出家貲助軍悉衣幣獻官掖加太子太傅封薊國公初東州承兵盜鄉邑凋破叔明治之二十年撫接有方華彝遂安後朝京師以病足賜錦輦令宦士肩舁以見旣尙書右僕射乞骸骨改太子太傅致仕貞元三年卒諡曰襄

宋

鮮于侁字子駿唐劔南節度使叔明裔性莊重力學第進

土爲江陵司理叅軍慶歷中應詔上言推災變所由與條當世四失其言剴切唐介與同鄉里言其名于上官交章論薦侁固讓乞移薦左參軍李景陽枝江令高汝土介益以爲賢調黟縣令攝治婺源豪民惡類屏跡通判綿州綿僻遠吏狃貪風侁一介弗取郡守以下皆效之趙抃薦于朝未及用從何郟辟簽書永興軍判官屬萬年令不職繫囚累百使侁往治數日而獄空熙寧詔求直言陳十六事神宗讀而記之范鎮薦除利路運判復上書論時政可爲憂患者一太息者二其他逆治體而名民怨者不可槩舉意專指王安石也安石怒短毀之上稱其學可用曰陛下何從知之上曰有章奏在安石始不敢言助役法行詔諸路各定役錢運使李瑜定四十萬侁爭以利州民貧地瘠請半之瑜不從各以事聞時諸路役書皆未就上是侁議

氏姓譜

卷百五十

一先 鮮于氏

二九

諭司農會布頌以爲式因黜瑜而升侁轉運副使仍兼提舉部民不請青苗錢安石遣吏接問侁曰立法本意願取則與民自不願豈能彊之蘇軾稱其上不法捕繫獄流下不傷民以爲三難利州守周永懿貪虐不法捕繫獄流之衡湖請更以文臣爲守併易班行領縣事二稅民輸絹綿侁奏聽以畸零納直後李元輔輒變而多取之父老流涕曰老運使之法何可改蓋侁姪亦居是職故稱老以別之居九年仍徙京東西路河決澶淵議欲勿塞侁言東州匯澤惟雨樂夏秋雨淫猶溢而爲害若縱大河注其中民爲魚矣作議河書以上神宗嘉納後兩路合爲一以侁爲轉運使嘆曰有薦舉之權而所列非賢恥也故所薦皆守道背時之士如劉擊李常二蘇范祖禹劉攽諸君時相不能容大爲所累侁畧無悔也元豐二年名對命知揚州上

語以廣陵重鎮久不得人今朕自選卿宜善治之蘇軾赴
速過揚親朋皆絕侑獨往見或勸宜焚其往來書文謝曰
欺君負友吾不忍爲以忠義分譴則所願也尋罷主管西
京御史臺哲宗立復以侑使京東司馬光言于朝曰侑賢
者不宜使居外顧齊魯之區凋敝已甚須往救之安得如
侑百輩布列天下乎士民聞其重臨如見慈母元祐初召
爲太常少卿議神宗配享侑曰先朝宰相之賢無如富弼
乃從其議以弼配拜左諫議大夫時哲宗冲幼上言君子
小人消長之理甚備又言國朝設制舉取士尤爲得人安
石忌諱詆訾遂廢其科請復之以搜羅賢俊廓通言路又
乞罷大理獄許兩省諫官得相往來減特奏恩嚴出官之
法京東鹽得通商復三路義勇以寬保甲罷戎瀘保甲以
寬民力事多施行在職三月以疾求去除集賢殿修撰知

氏姓譜

卷百五十

一先

鮮于氏

三十

陳州進待制卒年六十九侑刻意經術著詩傳易斷春秋
論作詩平澹淵深尤長于楚辭

元

鮮于樞字伯機號困學民漁陽郡人官太常典簿面帶河
朔偉氣每酒酣驚放吟詩作字奇態橫生善行草趙孟頫
謂樞蚤年嘗作吏故所書間有俗氣會見手編草韻下用
小楷音釋類鍾元常殊不易得云樞嘗于廢圃得怪松一
株移置屋前呼爲支離叟日夕與之相對所著詩文各因
學齋集子去矜孫端皆以能書名

歷代列女

鮮于氏名文英漁陽人鮮于文宗姊也適苟氏七日而夫
亡執節不嫁及母卒晝夜哭泣遂喪明

鮮于氏太常典簿樞女也衢州守伯顏不花的斤母先是

伯顏不花用父廕同知信州路事至正中賊寇信州伯顏不花自衛援信卽入拜其母曰兒今不得事母矣母曰爾爲忠臣吾卽死復何憾伯顏不花因命子也先不花奉其母間道入閩中力戰不勝城陷遂自死書史會要云鮮于太常錫草書逼真舅氏圖繪寶鑑云亦工畫龍

鮮陽氏

漢鮮陽戩揚州刺史孫滔武騎常侍

延陵氏

姬姓吳季札封延陵因氏焉延陵玉趙襄子謀臣

顓孫氏

媯姓陳公子顓孫仕晉子孫氏焉顓孫子英見說苑

歷代名賢

周

氏姓譜

卷百五十

一先

鮮陽氏至

三

顓孫師字子張陳人少孔子四十八歲弟子行云美功不伐貴位不喜不侮不佞不傲無告是顓孫師之行也子張問入官于孔子子曰安身取譽爲難子張曰爲如之何子曰已有善勿專教不能勿怠已過勿發失言勿倚不善勿遂行事勿留君子人官有此六者則身安譽至而政從矣忿數者獄之所由生也距諫者慮之所以塞也慢易者禮之所以失也怠惰者時之所以後也奢侈者財之所以不足也專獨者事之所以不成也君子入官除此六者則身安譽至而政從矣又問禮孔子曰治國而無禮譬猶瞽之無相偃偃乎何之譬猶終夜有求于幽室之中非燭何見故無禮則手足無所措耳目無所加進退揖讓無所制是故居處長幼失其別閨門三族失其和朝廷官爵失其序田獵戎事失其策軍旅武功失其勢故古之君子不必親

相與言也以禮樂相示而已子張子夏相與論終日不決
子夏詞氣甚隘顏色甚變子張曰子亦問夫子之議論耶
徐言闇闇威儀翼翼後言先默得之推讓巍巍乎道有歸
矣小人之論也專意自是瞋目搥腕疾言噴噴日沸目赤
一幸得勝疾笑隘隘是以君子賤之也子張見魯哀公七
日而不禮託僕夫而去曰臣聞君好士故不遠千里以見
七日而君不禮君之好士有似葉公子高之好龍也子張
既除喪而見予之琴和之而和彈之而成聲作而曰先王
制禮不敢不至焉子張名申詳而語之曰君子曰終小人
曰死吾今日其庶幾乎

元氏氏

乞姓羞也元氏舒箴唐校尉

肩吾氏

氏姓譜

卷百五十

一先

顧栴氏至

三

莊子肩吾古賢者肩吾氏漢東海太守

連尹氏

芊姓楚屈氏之後也連尹襄老

穿封氏

正字通複姓有穿封氏

歷代名賢

周

穿封成楚大夫康王十三年我侵吳遂侵鄭至于城麋鄭
皇頡成之出與我師戰師敗成囚皇頡公子圍爭之正于
伯州犂伯州犂曰請問于囚乃立囚伯州犂曰所爭君子
也其何不知上其手曰夫子爲王子圍寡君之貴介弟也
下其手曰此子爲穿封成方城外之縣尹也誰獲子囚曰
頡遇王子弱焉成怒搥戈逐王子圍弗及康王薨王子圍

祇荆敖自立是爲靈王靈王七年王滅陳使成爲陳公曰
城麋之役不諂待飲酒于王王曰城麋之役女知寡人之
及此女其辟寡人乎對曰若知君之及此臣必致死禮以
息楚

宣子氏

前趙錄劉淵太史令宣于修之

顓臾氏

風姓伏羲氏之後子孫以國爲氏

延州氏

姬姓吳季札又封州來又曰延州來因氏焉

鉛陵氏

見姓苑呂氏春 吳鉛陵卓子

顓王氏

氏姓譜

卷百五十

一先

宣子氏至

三

帝高陽氏也黃帝之孫

鮮虞氏

楚申鮮虞之後本齊人

縣潘氏

衛大夫柳莊卒君贈邑裘氏與縣潘二氏書納諸棺見

禮記註裘縣潘二邑名

芊尹氏

楚大夫芊尹申無宇之後

歷代名賢

周

芊尹蓋陳大夫事閔公閔公二十二年楚伐吳公使公孫
貞子及蓋弔焉及良而貞子卒蓋將以尸入吳子使大宰
嚭勞且辭曰以水潦之不時無乃稟然隕大夫之尸以重

寡君之憂敢辭上介蓋對曰寡君聞楚爲不道荐伐吳國滅厥民人寡君使蓋備使弔君之下吏無祿使人逢天之感大命隕隊絕世于良廢日共積一日遷次今君命逆使人曰無以尸造于門是我寡君之命委于草莽也且臣聞之曰事死如事生禮也于是乎有朝聘而終以尸將事之禮又有朝聘而遭喪之禮若不以尸將命是遭喪而還也無乃不可乎以禮防民猶或踰之今大夫曰死而棄之是棄禮也其何以爲諸侯主先民有言曰無穢虐士備使奉尸將命苟我寡君之命達于君所雖隕于深淵則天命也非君與涉人之過也吳人內之

下平聲

一請

昭沙氏

一作昭涉史記功臣表平州侯昭沙掉尾

氏姓譜

卷百五十

三肴

昭沙氏至

三四

鬻尹氏

見姓譜鬻尹喜周庶官

下平聲

二肴

茅夷氏

正字通云複姓也通志氏族畧云邾大夫茅夷鴻之後

歷代名賢

周

茅夷鴻邾大夫茅成子也隱公十八年秋魯伐我及范門猶聞鐘聲大夫諫不聽鴻請告于吳不許曰魯擊柝聞于邾吳二千里不至何及于我且國內豈不足鴻以茅叛魯師入以公歸囚諸負瑕鴻以束帛乘韋自請救于吳曰魯弱晉而遠矣馮恃其衆而背君之盟辟君之執事以陵我小國邾非敢自愛也懼君威之不立小國之憂也

若夏盟于鄆行秋而背之成求而不違四方諸侯其何以
事君且魯賦八百乘君之貳也邾賦六百乘君之私也以
私奉貳唯君圖之吳子從之明年伐魯魯乃歸公

苞邱氏

楚苞邱先生荀卿弟子

下平聲

四豪

高堂氏

齊公族也齊卿高敬仲食采于高堂因氏漢高堂生魯
人嘗論禮學仕爲博士高堂芝和帝時尙書令

歷代名賢

四豪

高堂隆字升平泰山平陽人魯高堂生後也少爲諸生泰
山太守薛悌命爲督郵郡督軍與悌爭論名悌而阿之隆

氏姓譜

卷百五十

四豪

高堂氏

三五

按劔勅督軍曰昔魯定見侮仲尼歷階趙彈秦箏相如進
缶臨臣名君義之所討也督軍失色悌驚起止之後去吏
避地濟南建安十八年曹操召爲丞相軍議掾後爲歷城
侯嶽文學轉爲相嶽遭操喪不哀反游獵馳騁隆以義正
諫甚得輔導之節黃初中爲堂陽長以選爲平原王傅王
卽尊位是爲明帝以隆爲給事中博士駙馬都尉帝初踐
阼羣臣或以爲宜饗會隆曰唐虞有遏密之哀高宗有不
言之恩是以至德雍熙光于四海以爲不宜爲會帝敬納
之遷陳留太守犢民西牧年七十餘有志行舉爲計曹掾
帝嘉之特除郎中以顯焉徵隆爲散騎常侍賜爵關內侯
青龍中大治殿舍西取長安大鐘隆上疏帝稱善遷侍中
猶領太史令崇華殿災詔問隆此何咎于禮寧有祈禳之
義乎隆條具以對詔問隆吾聞漢武帝時柏梁災而大起

宮殿以厭之其義云何隆對曰臣聞西京柏梁旣災越巫陳方建章是經以厭火祥乃夷越之巫所爲非聖賢之明訓也于是帝改容動色是歲有星孛于大辰隆上疏曰凡帝王徙都立邑皆先定天地社稷之位敬恭以奉之將營宮室則宗廟爲先殿庫爲次居室爲後今園邱方澤南北郊明堂社稷神位未定宗廟之制又未如禮而崇飾居室士民失業外人咸云官人之用與興戎軍國之費所盡畧齊民不堪命皆有怨怒書曰天聰明自我民聰明天明畏自我民明威輿人作頌則嚮以五福民怒呼嗟則威以六極言天之賞罰隨民言順民心也是以臨政務在安民爲先然後稽古之化格于上下自古及今未嘗不然也夫采椽卑宮唐虞大禹之所以垂皇風也玉臺瓊室夏癸商辛之所以犯昊天也今之宮室實違禮度乃更建立九龍華

氏姓譜

卷百五十

四象

高堂氏

三

飾過前天擘章灼始于房心犯帝座而于紫微此乃皇太子愛陛下是以發教戒之象始卒皆于尊位殷勤鄭重欲必覺寤陛下斯乃慈父懇切之訓宜崇孝子祇聳之禮以率先天下以昭示後昆不宜有忽以重天怒時軍國多事用法深重隆上疏帝從其議改青龍五年春三月爲景初元年孟夏四月服色尚黃犧牲用白從地正也遷光祿勳帝愈增崇宮殿彫飾觀閣鑿太山之石英采穀城之文石起景陽山于房林之園建昭陽殿于太極之北鑄作黃龍鳳皇奇偉之獸飾金鋪陵雲臺陵霄闕百役繁興作者萬數公卿以下至于學生莫不展力帝乃躬自掘土以率之而遼東不朝悼皇后崩天作淫雨冀州水出漂沒民物隆上疏切諫書奏帝覽焉謂中書監令曰觀隆此奏使朕懼哉隆疾篤口占上疏詔曰生廉侔伯夷直過史魚執心

堅白蹇蹇匪躬如何微疾未除退身里舍昔邴吉以陰德疾除而延壽貢禹以守節疾篤而濟愈生其疆飯專精以自持隆卒遺令薄葬斂以時服初太和中中護軍蔣濟上疏曰宜遵古封禪詔曰聞濟斯言使吾汗出流足事寢歷歲後遂議修之使隆撰其禮儀帝聞隆沒嘆息曰天不欲成吾事高堂生舍我亡也子琛嗣爵

高陵氏

嬴姓秦昭王弟封高陵君因氏焉高陵顯漢諫議大夫

陶邱氏

帝堯子丹朱居陶邱因氏焉周有陶邱德齊大夫漢陶

邱仁侍御史

歷代名賢

漢

氏姓譜

卷百五十

四豪

高陵氏至

三

陶邱洪字子林平原人清達博辯文冠當代舉孝廉不行辟太尉府年三十卒初東萊劉岱字公山弟繇字正禮兄弟齊各稱洪薦繇欲令舉茂才刺史曰前年舉公山奈何復舉正禮洪曰若使明君用公山于前擢正禮于後所謂御二龍於長塗騁騏驎于千里不亦可乎

曹邱氏

漢有辯士曹邱生楚人見季布傳

高陽氏

高陽氏之後高陽離古辯士見呂氏春秋

陶叔氏

姓纂云周司徒陶叔之後今平原有此姓陶叔真原大夫陶叔狐晉文公臣陶叔巷漢青州刺史

皋落氏

姬姓東山臯落氏赤狄別種

下平聲

五歌

何邱氏

見姓譜何邱子楚人後魏何邱京殿中將軍何邱奇

威將軍

羅侯氏

羅君之後支孫氏焉晋中山王司馬服如蜀郡羅侯氏

哥舒氏

其先蓋突騎施酋長哥舒郡之裔唐左清道率哥舒沮

世居安西生道元為安西都護將軍赤水軍使故仍世

居安西生子翰天寶中左僕射平章事西平王東討先

鋒兵馬元帥

歷代名賢

唐

卷百五十

五歌

何邱氏至

三

哥舒曜字子明翰子也八歲元宗召見華清宮擢尚輦奏
御累遷光祿卿以翰陷賊哀憤號慟故吏裴冕杜鴻漸等
見之嘆息李光弼討河北曜請行拜鴻臚卿為光弼副降
安太清救宋州有功改殿中監襲封為東都鎮守兵馬使
德宗立召為左龍武大將軍李希烈陷汝州以周冕為偽
刺史詔拜曜東都汝州行營節度使將鳳翔邠寧涇原奉
天好時兵萬人討希烈帝召見問曰卿治兵孰與父賢對
曰先臣臣安敢比但斬長蛇殪封豕然後待罪私室臣之
願也帝曰爾父在開元時朝廷無西憂今朕得卿亦不東
慮及行帝祖暹化門曜擊賊收汝州禽冕以獻斬其將二
人希烈退保許州詔城襄城曜以疲人版築不如按甲持
重以挫之帝不許有詔督戰曜進次頽橋雷震軍中七馬

斃曜懼還屯襄城希烈遣衆萬人縱火攻柵殪人于塹以薄壘曜苦戰破之居數月希烈自率兵三萬圍曜築甬道屬城矢集如雨帝遣神策將劉德信以兵三千援之又詔河南都統李勉出兵相犄角勉以希烈在外許守兵少乘虛襲之希烈自解乃遣部將與德信趨許未至有詔切讓使班師德信等惶惑還軍無斥候至扈澗爲賊設伏詭擊死者殆半器械輜重皆亡德信走汝州勉恐東都危使弟李學華以兵四千往守賊梗道不得入汴兵沮襄城圍益急帝乃詔普王以荆襄江西鄂沔之師討蔡州詔涇原節度使姁令言救襄城未行京師亂帝幸奉天襄城陷曜走洛陽會母喪奪爲東都畿汝節度使遷河南尹貞元元年部將叛夜焚河南門曜挺身免名入爲鴻臚卿終右驍衛上將軍贈幽州大都督子七人俱以儒聞峒茂才高第有

氏姓譜

卷百五十

五

獨瑋

元

節槩嶠嶢岷岷皆明經擢第

多子氏

見姓苑

下平聲

六麻

瑗邱氏

姬姓風俗通魯桓公庶子食采瑗邱因氏焉

歷代名賢

周

瑗邱仲甯人賣藥於甯百餘年一日地震仲及里中數千家屋臨水皆壞仲死里人棄仲尸于水中收其藥賣之少頃仲披裘而至里人惶懼謝罪仲曰非恨汝也使人知我耳復至甯世謂之謫仙人

輿邱氏

節度使鞠霸州疑獄稱旨授啟聖軍節度使太平中復爲本部太保謝病歸俄擢南院大王歎風俗日頹請老不許興宗命爲詩友數問治要多所匡建奉詔編遼國上世事跡及諸帝實錄授漢人行宮副部署大安七年知乙室大王事卒年九十

耶律韓留字速寧仲父隋國王之後有明識篤行義舉止嚴重工爲詩統和間名攝御院通進開泰三年稍遷烏古敵烈部都監俄知詳穩事敵烈部叛以爲東京統軍使將官分軍從耶律世良討平之加千牛衛大將軍進右夸离畢重熙元年遷上京留守同知改奚六部秃里太尉性不苟合爲樞密蕭解里所忌上欲召用言其目病不能視遂寢四年名爲北面林牙帝諭聞前目疾故待之至今對曰果然纒數月不至于昏第臣駑拙不能事權貴是以不獲

氏姓譜

卷百五十

六麻

耶律氏

四

早觀天顏非陛下聖察則愚臣豈有今日耶詔進述懷詩上嘉嘆拜爲惕隱至締居迭烈部節度使有惠政當代請留上命進其治狀方將大用卒

耶律資忠

字沃衍小字札刺系出仲父房與兄國留弟胎

俱博學工詞章兼善屬文聖宗重之國留妻弟之妻阿古

與奴通將奔女直追而殺之阿古自經其母有寵于太后

事聞后怒將殺國留帝度不能殺遣人訣別問以後事國

留謝曰陛下憫臣無辜恩漏九泉死且不朽在獄著兔賦

寤寐歌爲世所稱人故多寬之資忠年四十未仕聖宗知

其賢召補宿衛數問以古今治亂條封無隱開泰中授御

史中丞眷遇日隆權貴多短之出爲上京副留守初高麗

內屬取女直六部地以賜至是貢獻不時詔資忠往問高

麗無歸地意四年再使遂留弗遣在高麗六年每懷君親

轍有著述號西亭集帝與羣臣宴時一記憶曰資忠亦有此樂乎九年高麗上表謝罪始送資忠還帝郊迎同載以歸命大臣宴勞留禁中數日嘉其忠節不屈欲授樞密使辭以無才不敢奉詔乃除爲林牙知惕隱事專以外戚之女復不附寵臣蕭合卓少師蕭把哥奪官數載擢知來遠城事歷保安昭德二軍節度使聖宗崩表許會葬伏哭大慟曰臣幸遇聖明橫被構譖不獲盡犬馬報氣絕復蘇興宗命醫治疾又坐言國舅侍中無憂國心陛下不當復用唐景福舊號用事者益惡之遣歸鎮卒

耶律乙不哥字習撚六院郎君衷古直之後幼好學尤長于卜筮不樂仕進嘗爲人擇葬地曰後三日有牛乘人逐牛過者即啓土既葬吉凶盡如其言又爲失鷹者占曰鷹在汝家東北三十里深西榆上往求之果得當時古候無

不驗

卷百五十

六麻 耶律氏

四

耶律敵魯字撒不挽其先撒葛只本五院之族太祖時分隸太和宮精于醫術人有疾察其形色卽知病原雖不診候有十全功統和初丞相韓德讓貴寵敵魯希旨言德讓宜賜國姓籍橫帳故德讓薦之官至節度使耶律斜軫妻有沈疴易數醫不能治令視之曰心有畜熱非藥石可及當以意療因其贖聒之使狂用泄其毒則可治于是令大擊鉦鼓於前翌日果狂叫呼怒罵力極而止數日遂愈其治法多此類人莫能測年八十卒子孫世預太醫選因之入官者衆

耶律鐸軫字敵輦積慶宮人仕統和間性疎簡不顧小節人初短之後侵宋分總羸師以從及戰取紺帛被介胄以自標顯出入敵陣格殺甚衆太后望見而喜名語勅力如

此何患不濟厚賞之自是多任以軍事俄授東北詳穩開泰二年進討阻卜克之重熙間歷東路統軍天德軍節度使十七年城西邊命相地及造戰艦百三十艘上置兵下立馬規制堅壯甚稱上旨西征又詔率兵由別道進會于河濱敵兵阻河而陣帝御戰艦絕河擊之大捷而歸親賜卮酒仍問所欲對曰臣幸被聖恩得効駑力萬死不能報國又將何求帝愈重之手書其衣裾曰勤國忠君舉世無雙尋卒于官年七十子低烈歷觀察節度使

耶律突欲太祖阿保機長子東丹皇王也居遼東好學博覽外寬內恕立爲皇太子太祖問侍臣事天敬神祀孰爲先衆以佛對突欲曰孔子萬世之所尊太祖大悅卽命立孔子廟後太祖取渤海多其謀畫太祖薨以位讓弟德光景宗遣諡爲文獻欽義讓國皇帝其後子孫歷代蕃衍

氏姓譜

卷百五十

六麻 耶律氏

三

耶律嚴析律人父仲禧爲南院樞密使封韓國公仲禧本姓李遼主賜以國姓儼好學能詩且性廉介由進士累官參知政事後封涑水郡王卒贈尙父

金

耶律履遼東丹王突欲七世孫家廣寧通易太元精究歷數仕爲翰林直學士拜叅知政事進右丞卒諡文憲有集傳于後子辨材楚材善材皆有名

耶律辨材天資倜儻軀幹雄偉每以志節自負仕爲中京兵馬副都指揮使宣宗間以軍政利害辨材言將相多非其材遂忤權貴出爲許州兵馬鈐轄

耶律思忠履之姪同知歸德府會汴京戒嚴以都水監使克鎮撫軍民都彈壓金主名見思忠乞留死汴梁金主幸和議可成固遣之君臣相視泣下竟投城濠死贈工部尙

書金法最嚴惟思忠從事四十年未嘗有笞贖之垢

元

耶律楚材字晉卿生三歲而孤母楊氏教之學比長博極羣書旁通天文地理律歷衍數之說爲文若宿構者金貞祐初辟爲掾後遷燕京左右司員外郎太祖定燕京求遼宗室召至楚材身長八尺美髯宏聲帝偉之謂曰遠金世讐朕爲汝雪之對曰臣父祖嘗委質事金旣爲臣子敢讐君父邪帝重其言處之左右歲已卯夏六月帝西討回鶻國禡旗之日雨雪深三尺帝疑之對曰元冥之氣見于盛夏克敵徵也庚辰冬大雷復問之對曰回鶻國主當死中野後皆驗夏人常八斤善造弓見寵于帝每言國家方重武耶律儒者何用楚材曰治弓尚須用弓匠治天下者可不用天下匠耶帝聞之喜曰見親用國初未有歷西域人

氏姓譜

卷百五十

六麻一耶律氏

四

奏五月望夜月當蝕楚材曰否卒不蝕明年十月楚材言月當蝕西域人曰不蝕至期果蝕八分壬午八月長星見西方楚材曰女眞將易主矣未幾金宣宗果殂帝每征討必命楚材卜帝亦自灼羊脾以相符驗然後行甲申帝至東印度國駐鐵門關有一獸鹿形馬尾色綠而獨角能作人言謂侍衛者曰汝主宜早還帝怪問之對曰瑞獸也其名冉端能解四方語好生惡殺此天降符以告陛下陛下天之元子天下之民皆陛下子願承天心以全民命帝卽日班師丙戌冬從下靈武諸將爭取金帛楚材獨收遺書及大黃藥材旣而軍中病疫得大黃輒愈全活者萬人帝自經營西土未暇定制州郡長吏生殺任情燕京留後石抹咸得卜大帥石抹明安子也尤貪暴殺人盈市楚材聞之泣下卽入奏請禁州郡非奉璽書不得擅徵發囚當大

辟必待報違者罪死于是貪暴之風稍戢燕多劇盜未夕輒曳牛車指富家劫取財物不與則殺之遣楚材窮治得其姓名皆留後親屬及勢家子盡捕下獄戮首惡者于市燕民始安己丑秋太宗將卽位擇期八月二十二日宗親議未決時拖雷方監國問曰事猶未集別擇日可乎楚材曰過是無吉日矣遂翼太宗登寶位告親王察合台曰王雖兄位則臣也禮當拜王拜則莫敢不拜王深然之遽率皇族及臣僚拜帳下國初尊屬行拜禮自此始時中原甫定民多誤觸禁網而國法無赦令楚材獨請肆赦且條便宜十八事帝悉從之初太祖之征西域也倉庫無斗粟尺帛之儲羣言漢人無補于國不若空其人爲牧地楚材曰陛下將南伐軍需宜有所資誠均定中原地稅商稅鹽鐵酒醋山澤之利歲可得銀五十萬兩帛八萬匹粟四十餘

氏姓譜

卷百五十

六麻 耶律氏

四

萬石足以供給何謂無補哉太祖曰卿試爲朕行之乃奏立燕京等十路課稅所使副悉用士人以陳時可趙昉劉中等充之辛卯秋太宗至雲中十路咸進廩籍及金帛陳於庭帝顧之悅謂楚材曰汝不去朕左右而能使錢幣充足如此始立中書省卽曰拜楚材爲中書令事無鉅細皆得先白楚材舉鎮海粘合重山爲左右丞相權貴不能平咸得卜以舊怨尤疾之諧於宗王曰耶律中書令多用親舊必有二心請奏誅之宗王遣使以告帝不聽已而咸得卜爲人所訴帝命楚材按治奏曰此人倨傲故易招謗今方有事南土他日治之未晚帝謂侍臣曰楚材不較私讐真寬厚長者中貴可思不花請採金銀夫及種田西域與栽蒲萄戶帝令于西京宣德徙萬餘戶往楚材曰先帝遺詔山後民質朴無異國人緩急可用不宜輕動事遂寢王

辰春帝南征將渡河詔流民來降者免死楚材請製旗數百給降民使歸田里初蒙古之制凡攻城臨敵但以一矢加遺卽爲拒命旣克必屠之汴京將下大將速不台遣使來言曰金人抗拒日久請屠其城楚材聞之馳入奏曰將士暴露數十年所爭者土地人民耳得地無民將焉用之帝猶豫未決楚材曰奇巧之工厚藏之家皆萃于此殺之將一無所獲是徒勞也帝然之詔罪止完顏氏餘勿問時避兵在汴者全活凡百四十七萬戶當河南破時俘獲甚衆軍還逃者十七八詔凡居停逃民者滅其家鄉社連坐由是逃者多歿死楚材從容進曰河南旣平民皆朝廷赤子走復何之奈何因一俘囚連死數十百人乎帝悟命除其禁金之亡也唯秦鞏二十餘州未下楚材奏曰往者吾民逃罪或聚于此故以死拒守若許以不殺將不攻自下

氏姓譜

卷百五十

六麻 耶律氏

吳

詔下諸城皆降申午詔定中原戶籍羣臣共欲以丁爲戶楚材曰不可丁逃則賊無所出爭之再三卒以戶定時將相大臣出征俘獲往往寄匿他郡楚材因括戶口並出爲民容隱者死朝議欲遣回鶻人征江南漢人征西域楚材謂中原西域相去萬里未至敵境人馬疲乏兼水土異宜疾疫將作宜各從其便丙申春諸王大集帝親執觴賜楚材曰非卿則中原無今日帝議裂州縣賜親王功臣楚材曰裂土分民易生嫌隙不如多與金帛帝曰已許之矣奈何楚材曰朝廷張官置吏收其額賦歲終頒之使毋擅徵歛可也帝然其計遂定天下田賦分上中下三則朝議以爲太輕楚材曰作法于涼其弊猶貪後將有以利進者則今已重矣侍臣脫歡奏簡天下室女詔下楚材尼之不行帝怒楚材進曰向擇美女二十有八人已足備使令今復

選取臣恐擾民待覆奏耳帝良久曰可罷之又欲拘民間
牝馬楚材言漢地非產馬之鄉行之後必爲例是擾天下
也事乃已一日楚材奏曰制器者必用良工守成者必用
儒臣儒臣之事業非積數十年未易成也帝曰果爾可官
其人楚材請試之乃命宣課使劉中揚與隨郡考核分經
義詞賦論爲三科雖被俘爲奴者亦令就試其主匪勿遣
者死得士凡四千三十人並復其家免爲奴者四之一先
是州郡長吏多貸回鵲賈銀以償官息累數倍各羊羔利
至奴其妻子猶不足楚材奏令本利相伴而止著爲令民
間所負者官代償之凡七萬六千錠又一衡量給符印定
均輸立驛傳庶政畧備民稍蘇息焉有二道士爭長誣其
仇爲逃軍結中貴虐殺之楚材按收中貴帝怒繫楚材既
悔命釋之楚材不肯解縛曰臣備位中書國政所屬陛下

氏姓譜

卷百五十

六麻

耶律氏

四

初令繫臣以有罪也今釋臣是無罪也輕易反覆如戲少
兒何以辦國事帝溫言慰之曰朕日出萬言寧無過舉楚
材乃頓首謝因陳時務十策皆見施行太原路轉運使呂
振副使劉子振以賊敗帝詰楚材曰卿言孔子之教可行
何故乃有此輩對曰三綱五常聖人之各教有國家者莫
不由之如天之有日月也豈得緣一夫之失使萬世常行
之道獨廢于我朝乎帝意乃解燕京富人劉忽篤馬涉獵
發丁劉廷玉等陰結權貴以銀百萬兩撲買天下課稅楚
材謂此貪利之徒罔上虐下爲害甚大奏罷之常曰興一
利不如除一害生一事不如省一事任尙以班超之言爲
平平千古之下自有定論後有負譴者方知吾言之不妄
也帝素嗜酒日與大臣酣飲楚材數諫不聽乃持酒槽鐵
口進曰麴蘖能腐物鐵尙如此况五臟乎帝悟敕近臣日

進酒三鍾而止初楚材定課額歲止五十萬兩及河南降戶口滋息增至一百餘萬至是回鶻人與都刺合蠻請以二百二十萬兩撲買之楚材極諫至聲色俱厲言與涕俱帝曰爾欲博鬪邪又欲爲百姓哭邪姑試行之楚材不能奪嘆曰民之困窮將自此始矣辛丑春帝疾篤醫言脉已絕六皇后乃馬眞氏不知所爲召楚材問計對曰古人一言而熒惑退舍今囚繫非辜者多請肆赦天下后意欲急行楚材曰非君命不可頃之帝少蘇后以爲言帝首肯赦下之明日疾果愈十一月帝將出獵楚材以太乙數推之言不可帝不從獵五日而崩于行在后以儲事問楚材正色曰此非外姓臣敢知自有先皇遺詔在遵而行之社稷幸其后不聽竟自稱制于和林時奧都刺合蠻以貨得政柄后付以御寶空紙俾任意書壘楚材曰天下者先帝之

氏姓譜

卷百五十

六麻

耶律氏

四八

天下朝廷自有憲章今欲紊之臣不敢奉詔又有旨凡與都刺合蠻奏准事理令史不爲書者斷其手楚材曰軍國之事先帝悉委老臣令史何與焉事果合理自當奉行如不可行死且不避况截手乎后不悅楚材辨論不已因大聲曰老臣先後歷事三十餘年無負于國皇后豈能以無罪殺臣也后雖恨之亦深加敬憚甲辰五月以憂卒于位年五十五后賙贈特厚有潛之者言其在相位久天下財賦半入其家后命衛士覈視其庫藏唯琴玩十餘及古今書畫金石遺文數千卷文宗至順元年追封廣寧王諡文正

耶律鑄字成仲楚材子嗣領中書省事時年二十三上言宜疎禁網遂採歷代德政合于時宜者八十一章以進從憲宗征蜀領侍衛驍果軍屢出奇計攻下城邑會阿里不

哥反鑄棄妻子自朔方來歸世祖嘉其忠賞賜優厚中統二年拜中書左丞相監修遼金史尋將兵備北邊後引兵扈從敗阿里不哥于上都至元初奏定法令三十七章史民便之俄命行省山東遷調所部官屬尋召還初清廟雅樂止有登歌詔鑄製宮縣八佾舞樂舞成表上之賜名大成之樂十年加平章軍國重事自是時罷時復十四年冬以雨雪愆期帝使問便民事鑄曰足食之道唯節浮費靡穀之多無踰麴蘖况自周漢以來常有明禁祈神賽社費亦不貲宜一切罷止十九年復拜左丞相奏言有司以采室女乘機害民請令大郡歲取三人小郡二人擇其可者厚賜其父母否則遣還庶不致大擾並從之二十年坐寧罷沒家貲之半徙居山後遂卒文宗至順元年追贈懿寧王諡文忠

氏姓譜

卷百五十

六麻 耶律氏

兒

耶律希亮字明甫初六皇后命以赤帖吉氏歸鑄生希亮于和林南之涼樓曰秃忽思六皇后遂以其地名之故亦曰秃忽思憲宗嘗遣鑄覈錢粮于燕鑄曰臣先世皆讀書儒生俱在中土願攜諸子往就學許之比至燕令希亮師事北平趙衍時方九歲未浹旬已能賦詩憲宗征蜀鑄扈從南伐希亮亦在行憲宗崩希亮將輜重北歸陝右世祖卽位阿里不哥反渾都海在陝應之鑄子身歸朝渾都海怒使人監希亮母子脅之行至西涼甘州會叛將阿藍答兒自和林至見希亮問而父安在對曰不知與吾父共事者宜知之渾都海詎曰我焉得知而父令亡命東見皇帝矣希亮曰若然則何謂不知使吾知之亦從而去安得獨留旣而渾都海等爲大兵所殺衆推哈刺不花爲帥帥故與鑄有婚姻鑄又嘗周恤其病至是謂希亮曰我受而

父恩今於汝報遂釋希亮縛挾之北走希亮兄弟相扶攜
徒步萬里不火食者常累日是歲中統元年也三年從定
宗幼子大名王與宗王阿魯忽興師至不刺城與阿里不
哥兵戰屢捷四年春至可失哈里城世祖遣不華出至王
所以壘書名希亮起闕乃由苦先城至哈刺火州出伊州
涉大漠而還八月入覲世祖于上都備陳邊事及羈旅困
苦狀上憐之賜鈔幣授爲符寶郎有太府監令史盧贄言
于監官曰各路貢布唯平陽獨長以故諸怯薛反爭取苟
截其長與他郡等則無所爭而截者可備髹漆官殿用監
官從之左右以其事聞帝詰之監官惶悚惟歸罪于贄帝
命斬贄希亮遇諸塗贄呼寃希亮戒行刑者稍緩具以實
入奏如贄語帝令董文用復讞竟得釋累遷吏部尙書帝
駐蹕察納兒台之地希亮至奏對畢文用問大都近事希

氏姓譜

卷百五十

六麻

耶律氏

五

亮曰因圖多囚耳世祖方歆枕臥忽寤問其故奏曰近有
旨漢人盜鈔六文者斬以是日冬帝驚曰孰傳此言侍臣
脫兒察曰陛下在南坡曾以語蒙古兒童帝曰前言戲耳
曷嘗著爲令希亮曰令旣出矣必明其謀以安民心帝卽
令希亮至大都宣諭并釋囚者希亮以跋涉西土久足病
痿孿乃謝事居灤陽二十餘年武宗立特除翰林學士承
旨兼修國史希亮因類次世祖嘉言善行以進英宗取其
書置禁中泰定四年卒于京年八十一追封漆水郡公諡
忠嘉希亮性至孝當困厄遇方家貲散盡僅藏祖考畫像
四時就穹廬陳列致祭竭誠盡敬朔漠人咸相聚來觀嘆
曰此中華禮也雖疾病不廢書史所著詩文及從軍紀行
錄三十卷名懷軒集

耶律伯堅字壽之桓州人氣豪俠喜與名士遊用薦舉入

官爲工部主事世祖至元九年轉清苑縣尹初安肅州苦徐水爲患訴于大司農欲奪水故道導之使東入清苑境伯堅陳其形勢圖其利害謂果導則清苑徒被淹沒而水必反故道爲災請大司農司官及郡守行視可否事遂已縣西有塘水溉田甚廣勢家據爲磴民以失利來訴伯堅命毀磴決其水注之田許以溉田餘月仍得堰水置磴爲定制凡郡府賦役於縣有重於他縣者輒曰寧得罪於上不可得罪於下必詣府力爭在清苑四年民親之如父母比遷去立石頌其德

耶律之文世祖初監單州敦厚寡欲好賢下士門無私謁代去民思之後再至民甚樂之

耶律有尙孛伯強遠東丹王十世孫也祖父在金世嘗官東平因家焉有尙早篤學受業許衡之門號稱高弟至元

氏族譜 卷百五十一 六麻 耶律氏 五

八年衡除國子祭酒奏有尙爲齋長及衡告歸以有尙爲助教嗣領學事居久之除秘書監丞出知薊州皇太子眞金在東宮名爲詹事院長史自有尙去而國學事廢廷議謂非其人無足繼衡者乃除有尙國子司業時學館未建師弟子皆就民居有尙屢以爲言二十四年朝廷詔起學舍立國子監增廣弟子員以有尙爲祭酒儒風爲之丕振尋以親老辭大德改元名旉集賢學士八年又以葬父乞歸會朝廷思用老儒安車名之累辭不允復起昭文館大學士兼祭酒前後五居國學其立教以義理爲本而省察必真切以恭敬爲先而踐履必端慤凡文詞小技綴緝雕刻足以破裂聖人之道者舉皆屏去其法一遵衡舊而誠謹有加身爲學者師表數十年海內宗之旣而年老力請還家卒年八十六諡文正

歷代列女

耶律氏小字常哥遼太師適魯之妹幼爽秀有成人風及長操行修潔自誓不嫁能詩文不苟作讀通歷見前人得失歷能品藻咸雍間作文以述時政其畧曰君以民為體民以君為心人主當任忠賢人臣當去比周則政化平陰陽順欲懷遠則崇恩尚德欲強國則輕徭薄賦四端五典為治教之本六府三事實生民之命淫侈可以為戒勤儉可以為師錯在則人不敢詐顯忠則人不敢欺勿泥空門崇飾土木勿事邊鄙妄廢金帛滿當思盜安必慮危刑罰當罪則民勸善不寶遠物則賢者至建萬世磐石之業制諸部強橫之心欲率下則先正身欲治遠則始朝廷上稱善耶律乙辛因愛其才屢求詩遺以回文知其諷已衡之太康三年皇太子坐事謫兄適魯鎮州常哥布衣蔬食與

氏姓譜

卷百五十

六麻

耶律氏至
家僕氏至
五

之俱往人問何為自芘如此答曰皇儲無罪遭廢我輩豈美食安寢之時及太子被害不勝哀痛後卒于家年七十耶律氏妣姚里氏元薛闍母遼王耶律留哥妻也留哥卒姚里入奏會世祖征西域薛闍從之及還姚里携次子善哥見帝于河西請以薛闍襲爵帝曰薛闍從朕西征不可遣當令善哥襲爵姚里拜泣曰薛闍留哥前妻所出當立善哥婢子所出若立之是私已而滅天倫帝嘆其賢許以薛闍襲爵

斜烈氏

斜烈鼎字周瑞壽泗元帥

家僕氏

家僕徒晉大夫見左傳

瓜田氏

王莽時臨淮盜瓜田儀

車遽氏

周有車遽大夫

瑕呂氏

左傳晉有瑕呂飴甥

茄羅氏

見姓苑

氏姓譜

卷百五十

六麻

茄羅氏至

五三

氏姓譜卷百五十終

